

魏書



卷四之七



CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JUL 30 1936

196

T 2455/21



魏書卷四上

世祖紀第四上

哈佛大學漢和
圖書館珍藏

皇明朝列大夫國子監祭酒臣李廷機

承直郎國子監司業臣方從哲等奉

勅重校刊

世祖太武皇帝諱燾太宗明元皇帝之長子也母曰杜
貴嬪天賜五年生於東宮體貌瓌異太祖奇而悅之曰
成吾業者必此子也泰常七年四月封泰平王五月爲
監國太宗有疾命帝總攝百揆聰明大度意豁如也八
年十月壬申卽皇帝位大赦天下十有二月追尊皇妣
爲密皇太后進司徒長孫嵩爵爲北平王司空奚斤爲

宜城王藍田公長孫翰爲平陽王其餘普增爵位各有
差於是除禁錮釋嫌怨開倉庫賑窮乏河南流民相率
內屬者甚衆

始光元年春正月丙寅安定王彌薨夏四月甲辰東巡
幸大甯秋七月車駕還宮八月蠕蠕率六萬騎入雲中
殺掠吏民攻陷盛樂宮赭陽子尉普文率輕騎討之虜
乃退走詔平陽王長孫翰等擊蠕蠕別帥破之殺數千
人獲馬萬餘匹語在蠕蠕傳九月大簡輿徒治兵於東
郊部分諸軍五萬騎將北討冬十有二月遣平陽王長
孫翰等討蠕蠕車駕次祚山蠕蠕北遁諸軍追之大獲

而還是年劉義符爲其臣徐羨之等所廢殺立義符弟
義隆

二年春正月己卯車駕至自北伐以其雜畜班賜將士
各有差二月慕容渴悉隣反於北平攻破郡治太守與
守將擊敗之三月丙辰尊保母竇氏曰保太后丁巳以
北平王長孫蒿爲太尉平陽王長孫翰爲司徒宜城王
奚斤爲司空庚申營故東宮爲萬壽宮起末安安樂二
殿臨望觀九華堂初造新宇千餘詔曰在昔帝軒翊制
造物乃命倉頡因鳥獸之跡以立文字自茲以降隨時
改作故篆隸草楷並行於世然經歷久遠傳習多失其

真故令文體錯謬會義不愜非所以示軌則於來世也
孔子曰名不正則事不成此之謂矣今制定文字世所
用者頒下遠近未爲楷式夏四月詔龍驤將軍步堆謁
者僕射胡覲使於劉義隆五月詔天下十家發大牛一
頭運粟塞上秋九月未安安樂二殿成丁卯大饗以落
之冬十月治兵於西郊癸卯車駕北伐平陽王長孫翰
等絕漠追之蠕蠕北走事具蠕蠕傳是年赫連屈丐死
子昌僭立

三年春正月壬申車駕至自北伐班軍實以賜將士行
留各有差乞伏熾磐遣使朝貢請討赫連昌二月起太

學於城東祀孔子以顏淵配夏五月辛卯中山公元纂
進爵爲王南安公元素復先爵常山王六月幸雲中舊
宮謁陵廟西至五原田於陰山東至和峴山秋七月築
馬射臺于長川帝親登臺觀走馬王公諸國君長馳射
中者賜金錦繒絮各有差八月車駕還宮劉義隆遣使
朝貢帝以屈丐旣死諸子相攻九月遣司空奚斤率義
兵將軍封禮雍州刺史延普襲蒲坂宋兵將軍周幾率
洛州刺史于栗磾襲陝城冬十月丁巳車駕西伐幸雲
中臨君子津會天暴寒數日冰結十有一月戊寅帝率
輕騎二萬襲赫連昌壬午至其城下徙萬餘家而還語

在昌傳至祚山班所虜獲以賜將士各有差奚斤未至
蒲坂昌守將赫連乙升棄城西走昌弟助興守長安乙
升復與助興自長安西走安定奚斤遂入蒲坂十有二
月詔斤西據長安秦雍氏羌皆叛昌詣斤降武都氏王
楊玄及沮渠蒙遜等皆遣使內附

四年春正月乙酉車駕至自西伐賜留臺文武生口繪
帛馬牛各有差從人在道多死其能到都者纔十六七
已亥行幸幽州赫連昌遣其弟平原公定率衆二萬向
長安帝聞之乃遣就陰山伐木大造攻具二月車駕還
宮三月丙子遣高涼王禮鎮長安詔執金吾桓貸造橋

於君子津丁丑廣平王連薨夏四月丁未詔員外散騎
常侍步堆謁者僕射胡覲等使於劉義隆是月治兵講
武分諸軍司徒長孫翰廷尉長孫道生宗正娥清三萬
騎爲前驅常山王素太僕丘堆將軍元太毗步兵三萬
爲後繼南陽王伏真執金吾桓貸將軍姚黃眉步兵三
萬部攻城器械將軍賀多羅精騎三千爲前候五月車
駕西討赫連昌辛巳濟君子津三城胡曾鵠子相率內
附帝次拔隣山築城舍輜重以輕騎三萬先行戊戌至
于黑水帝親祈天告祖宗之靈而誓衆焉六月甲辰昌
引衆出城大破之事在昌傳昌將麾下數百騎西南走

魏書卷四十一 帝紀 四十一
奔上邽諸軍乘勝追至城北死者萬餘人臨陣殺昌弟
河南公滿及其兄子蒙遜會日暮昌尚書僕射問至拔
城夜將昌母出走乙巳車駕入城虜昌羣弟及其諸母
姊妹妻妾宮人萬數府庫珍寶車旗器物不可勝計擒
昌尚書王買薛超等及司馬德宗將毛脩之秦雍人士
數千人獲馬三十餘萬匹牛羊數千萬以昌宮人及生
口金銀珍翫布帛班賚將士各有差昌弟平原公定拒
司空奚斤於長安城娥清率騎五千討之西走上邽辛
酉班師留常山王素執金吾桓貸鎮統萬秋七月己卯
築壇於祚嶺戲馬馳射賜射中者金錦繒絮各有差蠕

蠕寇雲中聞破赫連昌懼而還走八月壬子車駕至自
西伐飲至策勳告於宗廟班軍實以賜留臺百寮各有
差九月丁酉安定民舉城歸降冬十有一月以氐王楊
玄爲都督荆梁益寧四州諸軍事假征南大將軍梁州
刺史南秦王十有二月行幸中山守宰貪污免者十數
人癸卯車駕還宮復所過田租之半

神麤元年春正月以天下守令多行非法精選忠良悉
代之辛未京兆王黎薨二月改元赫連昌退屯平涼司
空奚斤進軍安定將軍丘堆爲昌所敗監軍侍御史安
頡出戰擒昌昌餘衆立昌弟定爲王走還平涼三月癸

西詔侍中古弼迎赫連昌辛巳弼等以昌至于京師司
空奚斤追定於平涼馬髦嶺爲定所擒丘堆先守鞬重
在安定聞斤敗棄甲東走蒲坂帝聞大怒詔安頡斬堆
夏四月赫連定遣使朝貢帝詔諭之壬子西巡戊午田
于河西大赦天下南秦王楊玄遣使朝貢六月丁酉并
州胡酋卜田謀反伏誅餘衆不安詔淮南公王倍斤鎮
慮虜撫慰之甲寅行幸長川秋七月車駕還宮八月東
幸廣甯臨觀溫泉以太牢祭黃帝堯舜廟蠕蠕大檀遣
子將萬餘騎入塞事具蠕蠕傳上郡休屠胡酋金崖率
部內屬九月車駕還宮上洛巴渠泉午觸等萬餘家內

附冬十月甲辰北巡王子田于牛川劉義隆淮北鎮將
王仲德遣步騎二千餘入寇濟陽陳留是月車駕還宮
閏月辛巳義隆又遣將王玄謨兗州刺史竺靈秀步騎
二千人寇滎陽將襲虎牢豫州遣軍逆擊走之上郡屠
各隗詒歸率萬餘家內屬定州丁零鮮于臺陽翟喬等
二千餘家叛入西山劫掠郡縣州軍討之失利詔鎮南
將軍壽光侯叔孫建擊之十有一月行幸河西大校獵
十有二月甲申車駕還宮是歲皇子晃生乞伏熾盤死
子暮末僭立沮渠蒙遜遣使朝貢

二年春正月赫連定弟酒泉公儁自平涼來奔丁零鮮

于臺陽等歸罪詔赦之二月上黨李禹聚衆殺太守自稱無上王署置將帥河內守將擊破之禹亡走入山爲人執送斬之夏四月治兵于南郊劉義隆遣使朝貢庚寅車駕北伐以太尉北平王長孫嵩衛尉廣陵公樓伏連留守京師從東道與長孫翰等期會於賊庭五月丁未次于沙漠舍輜重輕騎兼馬至粟水蠕蠕震怖焚燒廬舍絕跡西走事具蠕蠕傳是月赫連定來侵統萬東至侯尼城而還秋七月車駕東轅至黑山校數軍實班賜王公將士各有差八月帝以東部高車屯巴尼陂詔左僕射安原率騎萬餘討之事具蠕蠕傳冬十月振旅

凱旋于京師告於宗廟列置新民於漠南東至濡源西暨五原陰山竟三千里詔司徒平陽王長孫翰尚書令劉潔左僕射安原侍中古弼鎮撫之十有一月西巡狩田于河西至祚山而還

三年春正月庚子車駕還宮壬寅大赦天下癸卯行幸廣寧臨溫泉作溫泉之歌二月丁卯司徒平陽王長孫翰薨戊辰車駕還宮三月壬寅進會稽公赫連昌爲秦王癸卯雲中河西勅勒千餘家叛尚書令劉潔追滅之帝聞劉義隆將寇邊乃詔冀定相三州造船三千艘簡幽州以南戍兵集于河上以備之夏四月甲子行幸雲

中勅勒萬餘落叛走詔尚書封鐵追討滅之五月戊戌
詔曰夫士之爲行在家必孝處朝必忠然後身榮於時
名揚後世矣近遣尚書封鐵翦除亡命其所部將士有
盡忠竭節以殞軀命者今皆追贈爵號或有蹈鋒履難
以自效者以功次進位或有故違軍法私離幢校者以
軍法行戮夫有功蒙賞有罪受誅國之常典不可暫廢
自今後以不善者可以自改其宣勅內外咸使聞知六
月詔平南大將軍假丹陽王太毗屯于河上以司馬楚
之爲安南大將軍琅邪王屯潁川秋七月己亥詔曰昔
太祖撥亂制度草創太宗因循未遑改作軍國官屬至

乃闕然今諸征鎮將軍王公仗節邊遠者聽開府辟召
其次增置吏員庚子詔大鴻臚卿杜超假節都督冀定
相三州諸軍事行征南大將軍太宰進爵爲王鎮鄴爲
諸軍節度八月清河羣盜殺太守劉義隆將到彥之自
清水入河泝流西行帝以河南兵少詔攝四鎮乃治兵
將西討丙寅到彥之遣將渡河攻冶坂冠軍將軍安頡
督諸軍擊破之斬首五千餘級投水死者甚衆甲戌行
幸南宮獵于南山戊寅詔征西大將軍長孫道生屯于
河上九月己丑赫連定遣弟謂以代寇鄜城平西將軍始
平公隗歸等率諸軍討之擒賊將王卑殺萬餘人謂以

代遁走癸卯立密皇太后廟于鄴甲辰行幸統萬遂征平涼冬十月庚申到彥之王仲德沿河置守還保東平乙亥冠軍將軍安頡濟河攻洛陽丙子拔之擒義隆將二十人斬首五千級時河北諸軍會于七女津彥之恐軍南度遣將王蟠龍泝流欲盜官船征南大將軍杜超等擊破斬之辛巳安頡平虎牢義隆司州刺史尹沖墜城死十有一月乙酉車駕至平涼先是赫連定將數萬人東禦於鄜城留其弟上谷公社于廣陽公度洛孤城守帝至平涼登北原使赫連昌招諭之社于不降詔安西將軍古弼等擊安定攻平涼定聞之棄鄜城入于安

定自率步騎三萬從鶉觚原將救平涼與弼相遇弼擊之殺數千人乃還走詔諸軍四面圍之甲午壽光侯叔孫建汝陰公長孫道生濟河到彥之王仲德從清入濟東走青州義隆兖州刺史竺靈秀棄須昌南奔湖陸丁酉定乏水引衆下原詔武衛將軍丘眷擊之定衆大潰死者萬餘人定中重創單騎遁走復定弟丹陽公烏視拔武陵公禿骨及公侯百餘人是日諸將乘勝進軍遂取安定定從兄東平公乙升棄城奔長安劫掠數千家西奔上邽戊戌叔孫建大破竺靈秀於湖陸殺獲五千餘人已亥帝幸安定獲乞伏熾磐質子及定車旗簿其

生口財畜班賜將士各有差庚子帝自安定還臨平涼
遂掘塹圍守之行幸經城安慰初附赦秦雍之民賜復
七年定隴西守及將士數千人來降辛丑冠軍將軍安
頡率諸軍攻滑臺琅邪王司馬楚之破劉義隆將於長
社沮渠蒙遜遣使朝貢壬寅封壽光侯叔孫建爲丹陽
王十有二月丁卯定弟社于度洛孤面縛出降平涼平
收其珍寶定長安臨晉武功守將皆奔走關中平壬申
車駕東還留巴東公延普等鎮安定是歲馮跋死弟文
通僭立

四年春正月壬午車駕次于木根山大饗羣臣賜布帛

各有差丙申劉義隆將檀道濟王仲德從清水救滑臺
丹陽王叔孫建汝陰公長孫道生拒之道濟等不敢進
是月乞伏暮末爲赫連定所滅二月辛酉安頡司馬楚
之平滑臺擒義隆將朱脩之李元德及東郡太守申謨
癸酉車駕還宮飲至策勳告於宗廟賜留臺百官各有
差戰士賜復十年丁丑行幸南宮定州民饑詔啓倉以
賑之義隆將檀道濟王仲德東走諸將追之至歷城而
還三月庚戌冠軍將軍安頡獻義隆俘萬餘人甲兵三
萬夏五月庚寅行幸雲中六月赫連定北襲沮渠蒙遜
爲吐谷渾慕瓚所執閏月乙未蠕蠕國遣使朝獻詔散

騎侍郎周紹使于劉義隆秋七月己酉行幸河西起承
華宮八月乙酉沮渠蒙遜遣子安周入侍吐谷渾慕瑣
遣使奉表請送赫連定己丑以慕瑣爲大將軍西秦王
九月癸丑車駕還宮庚申加大尉長孫嵩柱國大將軍
特進左光祿大夫崔浩爲司徒征西大將軍長孫道生
爲司空癸亥詔兼太常李順持節拜河西王沮渠蒙遜
爲假節加侍中都督涼州及西域羌戎諸軍事行征西
大將軍太傅涼州牧涼王壬申詔曰頃逆命縱逸方夏
未寧戎車屢駕不遑休息今二寇摧殄士馬無爲方將
偃武脩文遵太平之化理廢職舉逸民拔起幽窮延登

佞又昧旦思求想遇師黷雖殷宗之夢板築罔以加也
訪諸有司咸稱范陽盧玄博陵崔綽趙郡李靈河間邢
穎勃海高允廣平游雅太原張偉等皆賢雋之胄冠冕
州邦有羽儀之用詩不云乎鶴鳴九臯聲聞于天庶得
其人任之政事其臻邕熙之美易曰我有好爵吾與爾
縻之如玄之比隱跡衡門不耀名譽者盡勅州郡以禮
發遣遂徵玄等及州郡所遣至者數百人皆差次敘用
冬十月戊寅詔司徒崔浩改定律令行幸漠南十一月
丙辰北部勅勒莫弗庫若于率其部數萬騎驅鹿數百
萬詣行在所帝因而大狩以賜從者勒石漠南以記功

德宜城王奚斤坐事降爵爲公十二月丁丑車駕還宮
延和元年春正月丙午尊保太后爲皇太后立皇后赫
連氏立皇子晃爲皇太子謁于太廟大赦改年己巳詔
曰朕以眇身獲奉宗廟思闡洪基廓清九服遭值季運
天下分崩是用屢征罔或寧息自始光至今九年之間
戎車十舉羣帥文武荷戈被甲櫛風沐雨蹈履鋒刃與
朕均勞賴神祇之助將士宣力用能摧折疆豎克翦大
憝兵不極武而二寇俱滅師不違律而遐方以寧加以
時氣和洽嘉瑞並降遍於郡國不可勝紀豈朕一人獨
應此祐斯亦羣后協同之所致也公卿因茲稽諸天人

之會請建副貳夫慶賞之行所以褒崇勳舊旌顯賢能
以永無疆之休其王公將軍以下曾增爵秩啓國承家
脩廢官舉僑逸蠲除煩苛更定科制務從輕約除故革
新以正一統羣司當深思效績直道正身立功立事無
或懈怠稱朕意焉二月丙子行幸南宮三月丁未追贈
夫人賀氏爲皇后壬申西秦王吐谷渾慕瓚送赫連定
於京師夏五月大簡輿徒于南郊將討馮文通劉義隆
遣使朝貢六月庚寅車駕伐和龍詔尚書左僕射安原
等屯于漠南以備蠕蠕辛卯兼散騎常侍鄧穎使於劉
義隆秋七月己未車駕至濡水庚申遣安東將軍宜城

魏書卷四十一 帝紀十一
公奚斤發幽州民及密雲丁零萬餘人運攻具出南道
俱會和龍帝至遼西文通遣其侍御史崔聘奉獻牛酒
已巳車駕至和龍臨其城文通石城太守李崇建德太
守王融十餘郡來降發其民三萬人穿圍塹以守之是
月築東宮八月甲戌文通使數萬人出城挑戰昌黎公
元丘與河間公元齊擊破之死者萬餘人文通尚書高
紹率萬餘家保羌胡固已卯車駕討紹辛巳斬之詔平
東將軍賀多羅攻文通帶方太守慕容玄於候固撫軍
大將軍永昌王健次建德驃騎大將軍樂平王丕攻冀
陽皆拔之虜獲生口班賜將士各有差九月乙卯車駕

西還徙營丘成周遼東樂浪帶方玄菟六郡民三萬家
于幽州開倉以賑之冬十月癸酉車駕至濡水吐谷渾
慕瓚遣使朝貢十有一月乙巳車駕至自伐和龍十有
二月巳丑馮文通長樂公崇及其母弟朗朗弟邈以遼
西內屬文通遣將封羽圍遼西先是辟召賢良而州郡
多逼遣之詔曰朕除偽平暴征討累年思得英賢緝熙
治道故詔州郡搜揚隱逸進舉賢俊古之君子養志衡
門德成業就才爲世使或雍容雅步三命而後至或棲
棲遑遑負鼎而自達雖徇尚不同濟時一也諸召人皆
當以禮申諭任其進退何逼遣之有也此刺史守宰宣

揚失旨豈復光益乃所以彰朕不德自今以後各令鄉閭推舉守宰但宣朕虚心求賢之意既至當待以不次之舉隨才文武任之政事其明宣勅咸使聞知是年禿髮儁檀子保周棄沮渠蒙遜來奔以保周爲張掖公二年春正月乙卯撫軍大將軍永昌王健督諸軍救遼西丙寅以樂安王範爲假節加侍中都督秦雍涇梁益五州諸軍事衛大將軍儀同二司鎮長安二月庚午詔兼鴻臚卿李繼持節假馮崇車騎大將軍遼西王承制聽置尚書已下賜崇功臣爵秩各有差征西將軍金崖與安定鎮將延普及涇州刺史狄子玉爭權構隙舉兵

攻晉不克退保胡空谷驅掠平民據險自固詔散騎常侍平西將軍安定鎮將陸俟討獲之壬午行幸河西詔兼散騎常侍宋宣使於劉義隆丙申馮崇母弟朗來朝三月司馬德宗驃騎將軍司馬元顯子天助來降壬子車駕還宮夏五月己亥行幸山北六月遣撫軍大將軍永昌王健尚書左僕射安原督諸軍討和龍將軍樓勃別將五千騎圍瓦城文通守將封羽以城降收其民三千餘家辛巳詔樂安王範發秦雍兵萬人築小城於長安城內秋八月遼西王馮崇上表求說降其父帝不聽九月劉義隆遣使朝貢奉馴象一戊午詔兼大鴻臚卿

魏書卷四十四 帝紀十四
崔曠持節拜征虜將軍楊難當爲征南大將軍儀同三司封南秦王冬十月南秦王楊難當率衆圍漢中十有一月甲寅車駕自山北還宮十有二月己巳大赦天下辛未幸陰山之北隴西休屠王弘祖率衆內屬金崖旣死部人立崖從弟當川領其衆詔兼散騎常侍盧玄使於劉義隆是歲沮渠蒙遜死以其子牧犍爲車騎將軍改封河西王

三年春正月乙未車駕次于女水大饗羣臣班賜各有差戊戌馮文通遣其給事黃門侍郎伊臣乞和帝不許丙辰金當川及楊難當克漢中送雍州流民七千家于

長安二月丁卯蠕蠕吳提奉其妹并遣其異母兄禿鹿傀及左右數百人朝貢獻馬二千匹戊寅詔曰朕承統之始羣凶縱逸四方未賓所在逆僭蠕蠕陸梁於漠北鐵弗肆虐於三秦是以旰食忘寢抵掌扼腕期在掃清邊殘寧濟萬寓故頻年屢征有事西北運輸之役百姓勤勞廢失農業遭離水旱致使生民貧富不均未得家給人足或有寒窮不能自贍者朕甚愍焉今四方順軌兵革漸寧宜寬徃賦與民休息其令州郡縣隱括貧富以爲三級其富者租賦如常中者復二年下窮者復三年刺史守宰當務盡平當不得阿容以罔政治明相宣

約咸使聞知辛卯車駕還宮三月甲寅行幸河西閏月
甲戌秦王赫連昌叛走丙子河西侯將格殺之驗其謀
反羣弟皆伏誅巳卯車駕還宮彭城公元粟進爵爲王
辛巳馮文通遣尚書高顯上表稱藩詔徵其侍子戊子
金當川率其衆圍西川侯彭文暉於陰密夏四月乙未
詔征西大將軍常山王素討當川丁未行幸河西壬戌
獲當川斬之于長安以徇六月甲辰車駕還宮辛亥撫
軍大將軍永昌王健司空汝陰公長孫道生侍中古弼
督諸軍討和龍及其禾稼徙民而還秋七月辛巳東宮
成備置屯衛三分西宮之一壬午行幸美稷遂至隰城

命諸軍討山胡白龍于西河九月戊子克之斬白龍及
其將帥屠其城冬十月癸巳蠕蠕國遣使朝貢甲午破
白龍餘黨于五原詔山胡爲白龍所逼及歸降者聽爲
平民諸與白龍同惡斬數千人虜其妻子班賜將士各
有差十有一月車駕還宮十有二月甲辰行幸雲中
太延元年春正月壬午降死刑巳下各一等癸未出太
祖太宗宮人令得嫁甲申大赦改年二月庚子蠕蠕焉
耆車師諸國各遣使朝獻詔長安及平涼民徙在京師
其孤老不能自存者聽還鄉里丁未車駕還宮三月癸
亥馮文通遣大將渴燭通朝獻辭以子疾夏五月庚申

進宜都公穆壽爲宜都王汝陰公長孫道生爲上黨王
宜城公奚斤爲恒農王廣陵公樓伏連爲廣陵王本官
各如故遣使者二十輩使西域甲戌行幸雲中六月甲
午詔曰頃者寇逆消除方表漸晏思崇政化敷洪治道
是以屢詔有司班宣恩惠綏理百揆羣公卿士師尹牧
守或未盡導揚之美致令陰陽失序和氣不平去春小
早東作不茂憂勤克已祈請靈祇上下咸秩豈朕精誠
有感何報應之速雲雨震灑流澤霑渥有鄙婦人持方
寸玉印詣潞縣侯孫家旣而亡去莫知所在玉色鮮白
光照內映印有三字爲龍鳥之形要妙奇巧不類人迹

文曰早疫乎推尋其理蓋神靈之報應也朕用嘉焉比
者已來禎瑞仍臻所在甘露流液降於殿內嘉瓜合蒂
生于中山野木連理殖於魏郡在先后載誕之鄉白鷺
集于盛樂舊都玄鳥隨之蓋有千數嘉禾頻歲合秀於
恒農白雉白兔並見於渤海白雉三隻又集於平陽太
祖之廟天降嘉貺將何德以酬之所以內省驚震欣懼
交懷其今天下大酺五日禮報百神守宰祭界內名山
大川上答天意以求福祿丙午高麗鄯善國並遣使朝
獻戊申詔驃騎大將軍樂平王丕等五將率騎四萬東
伐文通秋七月田於柁楊巳卯丕等至於和龍徙男女

六千口而還八月丙戌遂幸河西粟特國遣使朝獻九月甲戌車駕還宮冬十月癸卯尚書左僕射安原謀反伏誅甲辰行幸定州次于新城宮十有一月乙丑行幸冀州己巳校獵于廣川丙子行幸鄴祀密太后廟諸所過對問高年褒禮賢俊十有二月甲申詔曰操持六柄王者所以統攝平政理訟公卿之所司存勸農平賦宰民之所專急盡力三時黔首之所克濟各脩其分謂之有序今更不然何以爲治越職侵局有紊綱紀上無定令民知何從自今以後亡匿避難羈族他鄉皆當歸還舊居不問前罪民相殺害牧守依法平決不聽私輒報

者誅及宗族隣伍相助與同罪州郡縣不得妄遣吏卒煩擾民庶若有發調縣宰集鄉邑三老計貲定課裒多益寡九品混通不得縱富督貧避疆侵弱太守覆檢能否覈其殿最列言屬州刺史明考優劣抑退姦吏升進貞良歲盡舉課上臺牧守荷治民之任當宣揚恩化奉順憲典與國同憂直道正身肅居官次不亦善乎癸卯遣使者以太牢祀北岳

二年春正月甲寅車駕還宮二月戊子馮文通遣使朝貢末送侍子帝不許壬辰遣使者十餘輩詣高麗東夷諸國詔諭之三月丙辰劉義隆遣使朝貢辛未平東將

軍賊清安西將軍古弼率精騎一萬討馮文通平州刺史元嬰又率遼西將軍會之文通迫急求救於高麗高麗使其大將葛蔓盧以步騎二萬人迎文通甲戌以闕鎮虎牢夏四月甲申皇子小兒苗兒金薨五月乙卯馮文通奔高麗戊午詔散騎常侍封檢使高麗徵送文通丁卯行幸河西赫連定之西也楊難當竊據上邽秋七月庚戌詔驃騎大將軍樂平王丕等督河西高平諸軍討之詔散騎侍郎廣平子游雅等使於劉義隆八月丁亥遣使六輩使西域帝校獵于河西詔廣平公張黎發定州七郡一萬二千人通沙泉道甲辰高車國遣使朝

獻九月庚戌驃騎大將軍樂平王丕等至略陽難當奉詔攝上邽守高麗不送文通遣使奉表稱當與文通俱奉王化帝以高麗違詔議將擊之納樂平王丕計而止冬十有一月己酉行幸相陽驅野馬於雲中置野馬苑閏月壬子車駕還宮乙丑潁川王提改封武昌王河西王沮渠牧犍遣使朝貢是歲吐谷渾慕瓚死

三年春正月癸未征東大將軍中山王纂薨戊子太尉北平王長孫嵩薨乙巳鎮南大將軍丹陽王叔孫建薨二月乙卯行幸幽州存恤孤老問民疾苦還幸上谷遂至代所過復田租之半高麗契丹國金遣使朝獻三月

魏書卷四十一 帝紀 十一
丁丑以南平王渾爲鎮東大將軍儀同三司鎮和龍已
卯車駕還宮癸巳龜茲悅般焉耆車師粟特疏勒烏孫
渴槃陀鄯善諸國各遣使朝獻丁酉劉義隆遣使朝貢
夏五月己丑詔曰方今寇逆消殄天下漸晏比年以來
屢詔有司班宣惠政與民寧息而內外羣官及牧守令
長不能憂勤所司糾察非法廢公帶私更相隱置濁貨
爲官政存苟且夫法之不用自上犯之其令天下吏民
得舉告守令不如法者丙申行幸雲中秋七月戊子使
撫軍大將軍永昌王健司空上黨王長孫道生討山胡
白龍餘黨於西河滅之八月甲辰行幸河西九月甲申

車駕還宮丁酉遣使者拜西秦王慕瓚弟慕利延爲鎮
西大將軍儀同三司改封西平王冬十月癸卯行幸雲
中十有一月壬申車駕還宮甲申破洛那者舌國各遣
使朝獻奉汗血馬是歲河西王沮渠牧犍出子封壇來
朝

四年春三月庚辰鄯善王弟素延者來朝癸未罷沙門
年五十巴下江陽王根薨是月高麗殺馮文通夏五月
戊寅大赦天下丙申行幸五原秋七月壬午車駕北伐
事具蠕蠕傳冬十月乙丑大饗六軍十二月丁巳車駕
至自北伐上洛巴泉萆等相率內附詔兼散騎常侍高

雅使劉義隆

五年春正月庚寅行幸定州三月丁卯詔衛大將軍樂安王範遣雍州刺史葛邾取上洛劉義隆上洛太守鍾長生棄郡走辛未車駕還宮庚寅以故南秦王世子楊保宗爲征南大將軍秦州牧武都王鎮上邽夏四月丁酉鄯善龜茲疏勒焉耆諸國遣使朝獻五月丁丑治兵於西郊癸未遮逸國獻汗血馬六月甲辰車駕西討沮渠牧犍侍中宜都王穆壽輔皇太子決留臺事大將軍長樂王嵇敬輔國大將軍建寧王崇二萬人屯漠南以備蠕蠕秋七月己巳車駕至上都屬國城大饗羣臣講

武馬射壬午留輜重分部諸軍撫軍大將軍永昌王健尚書令鉅鹿公劉潔諸軍與常山王素二道並進爲前鋒驃騎大將軍樂平王丕太宰陽平王杜超督平涼郿城諸軍爲後繼八月甲午永昌王健獲牧犍牛馬畜產二十餘萬牧犍遣弟董來率萬餘人拒戰於城南望塵退走丙申車駕至姑臧牧犍兄子祖踰城來降乃分軍圍之九月丙戌牧犍兄子萬年率麾下來降是日牧犍與左右文武五千人面縛軍門帝解其縛待以藩臣之禮收其城內戶口二十餘萬倉庫珍寶不可稱計進張掖公秃髮保周爵爲王與龍驤將軍穆羆安遠將軍源

賀分略諸郡雜人降者亦數十萬牧犍弟張掖太守宜
得燒倉庫西奔酒泉樂都太守安周南奔吐谷渾遣鎮
南將軍奚眷討張掖遂至酒泉牧犍弟酒泉太守無諱
及宜得復奔晉昌使弋陽公元潔守酒泉鎮北將軍封
沓討樂都掠數千家而還班賜將士各有差戊子蠕蠕
犯塞遂至七介山京師大駭皇太子命上黨王長孫道
生等拒之事具蠕蠕傳冬十月辛酉車駕東還徙涼州
民三萬餘家于京師留驃騎大將軍樂平王丕征西將
軍賀多羅鎮涼州癸亥遣張掖王禿髮保周諭諸部鮮
卑保周因率諸部叛於張掖十有一月乙巳劉義隆遣

使朝獻并獻馴象一是月高麗及粟特渴盤陀破洛那
悉居半諸國各遣使朝獻十有二月壬午車駕至自西
伯飲至策勳告於宗廟楊難當寇上邽鎮將元勿頭擊
之是歲鄯善龜茲疏勒焉耆高麗粟特渴盤陀破洛
那悉居半等國並遣使朝貢沮渠無諱圍酒泉辛亥分

魏書卷四下 世祖紀第四下

皇明朝列大夫國子監祭酒臣李延機

承直郎國子監司業臣方從哲等奉

勅重校刊

太平真君元年春正月己酉沮渠無諱圍酒泉辛亥分遣侍臣巡行州郡觀察風俗問民疾苦壬子無諱誘執弋陽公元潔二月己巳詔假通直常侍邢穎使於劉義隆發長安五千人浚昆明池三月酒泉陷夏四月庚辰無諱寇張掖禿髮保周屯于刪丹丙戌詔撫軍大將軍永昌王健等督諸軍討保周五月辛卯行幸北部乙巳

無諱復圍張掖不克退還丙辰車駕還宮六月丁丑皇
孫濬生大赦改年秋七月行幸陰山巳丑永昌王健至
番禾破保周保周遁走丙申皇太后竇氏崩于行宮癸
丑保周自殺傳首京師八月甲申無諱降送大陽公元
潔及諸將士九月壬寅車駕還宮冬十有一月丁亥行
幸山北十二月車駕還宮是歲州鎮十五民饑開倉賑
恤以河南王曜子羯兒爲河間王後改封略陽王
二年春正月癸卯拜沮渠無諱爲征西大將軍涼州牧
酒泉王甲辰行幸溫泉二月壬戌車駕還宮三月辛卯
葬惠太后於崞山庚戌新興王俊略陽王羯兒有罪並

黜爲公辛亥封蠕蠕郁久閭乞列歸爲朔方王沮渠萬
年爲張掖王夏四月丁巳劉義隆遣使朝貢庚辰詔鎮
南將軍南陽公奚眷征酒泉五月辛卯行幸山北秋八
月辛亥詔散騎侍郎張偉等使劉義隆行幸河西九月
戊戌撫軍大將軍永昌王健薨冬十有一月庚子鎮南
將軍奚眷平酒泉獲沮渠天周臧嗟屈德男女四千口
十有二月甲戌車駕還宮丙子劉義隆遣使朝貢
三年春正月甲申帝至道壇親受符籙備法駕旗幟盡
青語在釋老志三月壬寅北平王長孫頽有罪削爵爲
侯夏四月無諱走渡流沙據鄯善李暉孫寶據敦煌遣

使內附三月行幸陰山之北閏月劉義隆龍驤將軍裴
方明梁州刺史劉康祖寇南秦南秦王楊難當敗奔於
上邽六月丙戌難當朝於行宮先是起殿於陰山之北
殿始成而難當至因名曰廣德焉秋七月丙寅詔安西
將軍建興公古弼督隴右諸軍及殿中虎賁與武都王
楊保宗等從祁山南入征西將軍淮陽公皮豹子與琅
邪王司馬楚之等督關中諸軍從散關西入俱會仇池
鬱林公司馬文思爲征南大將軍進爵譙王督洛豫諸
軍事南趣襄陽征南將軍東安公刁雍東趣廣陵邀方
明歸路冬十月己卯封皇子伏羅爲晉王翰爲秦王譚

爲燕王建爲楚王余爲吳王十有二月辛巳侍中太保
襄城公盧魯元薨丁酉車駕還宮李寶遣使朝貢以寶
爲鎮西大將軍開府儀同三司沙州牧封敦煌公

四年春正月己巳征西將軍皮豹子等大破劉義隆將
於樂鄉擒其將王奐之王長卿等強玄明辛伯奮棄下
辨遁走追斬之盡虜其衆庚午行幸中山二月丙子車
駕至于恒山之陽詔有司刊石勒銘是月克仇池三月
庚申車駕還宮壬戌烏洛侯國遣使朝貢夏四月武都
王楊保宗謀反諸將擒送京師諸氏羌復推保宗弟文
德爲主圍仇池丁酉大赦天下己亥行幸陰山五月將

軍古弼大破諸氏解仇池圍六月庚寅詔曰朕承天子
民憂理萬國欲令百姓家給人足興於禮義而牧守令
宰不能助朕宣揚恩德勤恤民隱至乃侵奪其產加以
殘虐非所以爲治也今復民貲賦三年其田租歲輸如
常牧守之徒各厲精爲治勸課農桑不得妄有徵發有
司彈糾勿有所縱癸巳大閱于西郊秋九月辛丑行幸
漠南甲辰捨輜重以輕騎襲蠕蠕分軍爲四道事具蠕
蠕傳鎮北將軍封杏亡入蠕蠕冬十一月將軍皮豹子
等追破劉義隆將於濁水甲子車駕至於朔方詔曰朕
承祖宗重光之緒思闡洪基恢隆萬世自經營天下平

暴除亂靖清不順二十年矣夫陰陽有往復四時有代
謝授子任賢所以休息優隆功臣式圖長久蓋古今不
易之令典也其令皇太子副理萬機總統百揆諸朕功
臣勤勞日久皆當以爵歸第隨時朝請饗宴朕前論道
陳謨而已不宜復煩以劇職更舉賢俊以備百官主者
明爲科制以稱朕心十二月辛卯車駕至自北伐

五年春正月壬寅皇太子始總百揆侍中中書監宜都
王穆壽司徒東郡公崔浩侍中廣平公張黎侍中建興
公古弼輔太子以決庶政諸上書者皆稱臣上疏儀與
表同戊申詔曰愚民無識信惑妖邪私養師巫挾藏讖

記陰陽圖緯方伎之書又沙門之徒假西戎虛誕生致妖孽非所以壹齊政化布淳德於天下也自王公已下至於庶人有私養沙門師巫及金銀工巧之人在其家者皆遣詣官曹不得容匿限今年二月十五日過期不出師巫沙門身死主人門誅明相宣告咸使聞知庚戌詔曰自頃以來軍國多事未宣文教非所以整齊風俗示軌則於天下也今制自王公已下至於卿士其子息皆詣太學其百工伎巧騶卒子息當習其父兄所業不聽私立學校違者師身死主人門誅二月辛未中山王辰等八將以北伐後期斬于都南癸酉驃騎大將軍樂

平王丕薨庚辰行幸廬_闕三月戊戌大會于那南池遣使者四輩使西域甲辰車駕還宮癸丑詔征西大將軍司空上黨王長孫道生鎮統萬夏四月乙亥侍中太宰陽平王杜超爲帳下所殺五月丁酉行幸陰山之北六月北部民殺立義將軍衡陽公莫孤率五千餘落北走追擊于漠南殺其渠帥餘徙居冀相定三州爲營戶西平王吐谷渾慕利延殺其兄子緯代是月緯代弟叱力延等來奔乞師以叱力延爲歸義王秋七月癸卯東雍州刺史沮渠秉謀叛伏誅八月乙丑田于河西壬午詔員外散騎常侍高濟使於劉義隆晉王伏羅督高平涼

魏書卷四十一 帝紀 五
州諸軍討吐谷渾慕利延九月帝自河西至馬邑觀于
崞川己亥車駕還宮丁未行幸漠南冬十月癸未晉王
伏羅大破慕利延慕利延走奔白蘭慕利延從弟伏念
長史鵠鳩梨部大崇娥等率其部一萬三千落內附十
一月劉義隆遣使朝貢十二月粟特國遣使朝貢丙戌
車駕還宮

六年春正月辛亥車駕行幸定州引見長老存問之詔
兼員外散騎常侍宋愔使劉義隆二月遂西幸上黨觀
連理樹於泫氏西至吐京討徙叛胡出配郡縣三月庚
申車駕還宮詔諸有疑獄皆付中書以經義量決是月

酒泉公郝溫反於杏城殺守將王幡縣吏蓋鮮率宗族
討溫溫棄城走自殺家屬伏誅夏四月庚戌征西大將
軍高涼王那等討吐谷渾慕利延於陰平白蘭詔秦州
刺史天水公封勅文擊慕利延兄子什歸於枹罕散騎
常侍成周公萬度歸乘傳發涼州以西兵襲鄯善六月
壬辰車駕北巡什歸聞軍將至棄城夜遁秋八月丁亥
封勅文入枹罕分徙千家還上邽壬辰度歸以輕騎至
鄯善執其王真達以詣京師帝大悅厚待之車駕幸陰
山之北次于廣德宮詔發天下兵三分取一各當戒嚴
以須後命徙諸種雜人五千餘家於北邊令民北徙畜

魏書卷四十一 帝紀六
牧至廣漠以餌蠕蠕壬寅高涼王那軍到曼頭城慕利
延驅其部落西渡流沙那急追故西秦王慕瓚世子被
囊逆軍拒戰那擊破之被囊輕騎遁走中山公杜豐精
騎追之度三危至雪山生擒被囊什歸及熾盤子成龍
送于京師慕利延遂西入于闐國九月盧水胡蓋吳聚
衆反於杏城冬十月戊子長安鎮副將元紇率衆討之
爲吳所殺吳黨遂盛民皆渡渭奔南山於是詔發高平
勅勒騎赴長安詔將軍叔孫拔乘傳領攝并秦雍兵屯
渭北十有一月高涼王那振旅還京師己未遣那及殿
中尚書安定公韓茂率騎屯相州之陽平郡發冀州民

造浮橋於碣磔津蓋吳遣其部落帥白廣平西掠新平
安定諸夷酋皆聚衆應之殺汧城守將吳遂進軍李閏
堡分兵掠臨晉巴東將軍章直與戰大敗之兵溺死於
河者三萬餘人吳又遣兵西掠至長安將軍叔孫拔與
戰於渭北大破之斬首三萬餘級庚申遼東王竇漏頭
薨河東蜀薛末宗聚黨盜官馬數千匹驅三千餘人入
汾曲西通蓋吳受其位號秦州刺史金城公周鹿觀率
衆討之不克而還庚午詔殿中尚書扶風公元處真尚
書平陽公慕容嵩二萬騎討薛末宗詔殿中尚書乙拔
率五將三萬騎討蓋吳西平公寇提三將一萬騎討吳

黨白廣平蓋吳自號天台王署置百官辛未車駕還宮
選六州兵勇猛者二萬人使永昌王仁高涼王那分領
爲二道各一萬騎南略淮泗以北徙青徐之民以實河
北癸未車駕西征

七年春正月戊辰車駕次東雍州庚午圍薛永宗營壘
未宗出戰大敗六軍乘之永宗衆潰永宗男女無少長
赴汾水死辛未車駕南幸汾陰庚辰帝臨戲水蓋吳退
走北地二月丙戌幸長安存問父老丁亥幸昆明池丙
申幸盤屋誅叛民耿青孫溫二壘與蓋吳通謀者軍次
陳倉誅散關氏害守將者還幸雍城田於岐山之陽北

道諸軍乙拔等大破蓋吳於杏城吳棄馬遁走永昌王
仁至高平擒劉義隆將王章略金鄉方與遷其民五千
家於河北高涼王那至濟南東平陵遷其民六千餘家
於河北三月詔諸坑沙門毀諸佛像徙長安城工巧二
千家於京師車駕旋軫幸洛水分軍誅李閏叛羌是月
金城邊罔天水梁會反據上邽東城秦州刺史封勅文
擊之斬罔衆復推會爲帥夏四月甲申車駕至自長安
戊子鄴城毀五層佛圖於泥像中得玉璽二其文皆曰
受命於天旣壽永昌其一刻其旁曰魏所受漢傳國璽
五月癸亥安豐公閻根率騎詣上邽與勅文討梁會會

走漢中蓋吳復聚杏城自號秦地王假署山民衆旅復振於是遣永昌王仁高涼王那督北道諸軍同討之六月甲申發定冀相三州兵二萬人屯長安南山諸谷以防越逸丙戌發司幽定冀四州十萬人築畿上塞圍起上谷西至于河廣袤皆千里秋八月蓋吳爲其下人所殺傳首京師永昌王仁平其遺燼高涼王那破蓋吳黨白廣平生擒屠各路那羅於安定斬于京師復略陽公羯兒王爵

八年春正月吐京胡阻險爲盜詔征東將軍武昌王提征南將軍淮南王他討之不下山胡曹僕渾等渡河西

保山以自固招引朔方諸胡提等引軍討僕渾二月己卯高涼王那等自安定討平朔方胡因與提等合軍共攻僕渾斬之其衆赴險死者以萬數癸未行幸中山頒賜從官文武各有差高陽易縣民不從官命討平之徙其餘燼於北地三月河西王沮渠牧犍謀反伏誅徙定州丁零三千家於京師夏五月車駕還宮六月西征諸將扶風公元處真等八將坐盜沒軍資所在虜掠賊各千萬計並斬之八月衛大將軍樂安王範薨冬十月侍中中書監宜都王穆壽薨十二月鄯善遮逸國並遣子朝獻晉王伏羅薨

九年春正月劉義隆遣使朝貢氏楊文德受義隆官號
守葭蘆城招誘武都陰平五部氏民詔仇池鎮將皮豹
子討之文德棄城南走擒其妻子寮屬義隆白水太守
郎啓玄率衆救文德豹子逆擊大破之啓玄文德走還
漢中宕昌羌酋梁瑾慈遣使內附并貢方物二月癸卯
行幸定州山東民饑啓倉賑之罷塞圍作遂西幸上黨
誅潞叛民二千餘家徙西河離石民五千餘家于京師
詔於壺關東北大王山累石爲三封又斬其北鳳皇山
南足以斷之三月車駕還宮夏五月甲戌以交趾公韓
拔爲假節征西將軍領護西戎校尉鄯善王鎮鄯善賦

役其民比之郡縣六月辛酉行幸廣德宮丁卯悅般國
遣使來與王師俱討蠕蠕帝許之秋八月詔中外諸軍
戒嚴九月乙酉治兵于西郊丙戌上幸陰山是月成周
公萬度歸千里驛上大破焉耆國其王鳩尸卑那奔龜
茲冬十月辛丑恒農王奚斤薨癸卯以婚姻奢靡喪葬
過度詔有司更爲科限癸亥大放天下十有二月詔成
周公萬度歸自焉耆西討龜茲皇太子朝于行宮遂從
北討至于受降城不見蠕蠕因積糧城內留守而還北
平王長孫敦坐事降爵爲公

十年春正月戊辰朔帝在漠南大饗百寮班賜有差甲

魏書卷四十一 帝紀十一
或北伐二月蠕蠕渠帥爾綿他拔等率其部落千餘家
來降蠕蠕吐賀真恐懼遠遁事具蠕蠕傳三月遂蒐于
河西庚寅車駕還宮夏五月庚寅行幸陰山秋七月浮
圖沙國遣使貢獻九月閱武磧上遂北伐事具蠕蠕傳
冬十月庚子皇太子及羣官奉迎於行宮壬午大饗班
賜所獲及布帛各有差十有一月龜茲疏勒破落那員
闕諸國各遣使朝獻十有二月戊申車駕至自北伐已
酉以平昌公元託真爲中山王

十一年春正月乙酉行幸洛陽所過郡國皆親對高年
存恤孤寡以高涼王那爲儀同三司二月甲午大蒐於

梁川皇子真薨是月大治宮室皇太子居于北宮車駕
遂征懸瓠益遣使者安慰境外之民其不服者誅之永
昌王仁大破劉義隆將劉坦之程天祚於汝東斬坦之
擒天祚夏四月癸卯輿駕還宮賜從者及留臺郎吏已
上生口各有差六月己亥誅司徒崔浩辛丑北巡陰山
秋七月義隆遣其輔國將軍蕭斌之率衆六萬寇濟州
刺史王買得棄州走斌之遂入城仍使寧朔將軍王玄
謨西攻滑臺詔枋頭鎮將平南將軍南康公杜道儁助
守兗州八月癸亥田於河西癸未治兵於西郊九月辛
卯輿駕南伐癸巳皇太子北伐屯於漠南吳王余留守

京都庚子曲赦定冀相三州死罪已下發州郡兵五萬分給諸軍冬十月癸亥車駕止枋頭詔殿中尚書長孫真率騎五千自石濟渡備玄謨遁走乙丑車駕濟河玄謨大懼棄軍而走衆各潰散追躡斬首萬餘級器械山積帝遂至東平蕭斌之棄濟州退保歷城乃命諸將分道並進使征西大將軍永昌王仁自洛陽出壽春尚書長孫真趨馬頭楚王建趨鍾離高涼王那自青州趨下邳車駕自邗道十有一月辛卯至于鄒山劉義隆魯郡太守崔邪利率屬城降使使者以太牢祀孔子壬子次于彭城遂趨盱眙頽盾國獻師子一十有二月丁卯車

駕至淮詔刈荏葦作筏數萬而濟義隆盱眙守將臧質閉門拒守將軍胡崇之等率衆二萬援盱眙燕王譚大破之臧崇之等斬首萬餘級淮南皆降是月永昌王仁攻懸瓠拔之獲義隆守將趙淮送京師斬之過定項城及淮西大破義隆將劉康祖斬之并虜將軍胡盛之王羅漢等傳致行宮癸未車駕臨江起行宮於瓜步山永昌王仁自歷陽至於江西高涼王那自山陽至於廣陵諸軍皆同日臨江所過城邑莫不望塵奔潰其降者不可勝數甲申義隆使獻百牢貢其方物又請進女於皇孫以求和好帝以師婚非禮許和而不許婚使散騎侍

郎夏侯野報之詔皇孫爲書致馬通問焉

正平元年春正月丙戌朔大會羣臣於江上班賞各有
差文武受爵者二百餘人丁亥與駕北旋是月破洛那
剽賓迷密諸國各遣使朝獻二月戊寅車駕濟河癸未
次于魯口皇太子朝於行宮三月己亥車駕至自南伐
飲至策勳告於宗廟以降民五萬餘家分置近畿賜留
臺文武所獲軍資生口各有差夏五月壬寅大赦六月
壬戌改年車師國王遣子入侍詔曰夫刑網太密犯者
更衆朕甚愍之有司其案律令務求厥中自餘有不便
於民者依比增損詔太子少傅游雅中書侍郎胡方回

等改定律制略陽王羯兒儀同三司高涼王那有罪賜
死戊辰皇太子薨壬申葬景穆太子於金陵秋七月丁
亥行幸陰山省諸曹吏員三分之一九月癸巳車駕還
宮冬十月庚申行幸陰山劉義隆遣使朝貢詔殿中將
軍郎法祐使於義隆己巳司空上黨王長孫道生薨十
有二月丁丑車駕還宮封皇孫濬爲高陽王尋以皇孫
世嫡不宜在藩乃止封秦王翰爲東平王燕王譚爲臨
淮王楚王建爲廣陽王吳王余爲南安王

二年春正月庚辰朔南來降民五千餘家於中山謀叛
州軍討平之冀州刺史張掖王沮渠萬年與降民通謀

賜死三月甲寅帝崩於未安宮時年四十五祕不發喪
中常侍宗愛矯皇后令殺東平王翰迎南安王余入而
立之大赦改元爲永平尊皇后赫連氏爲皇太后三月
辛卯上尊諡曰太武皇帝葬於雲中金陵廟號世祖夏
六月劉義隆將檀和之寇濟州梁坦及魯安生軍于京
索龐萌薛安都寇弘農秋七月征南將軍安定公韓元
興討之和之退梁坦安生亦走八月冠軍將軍封禮率
騎二千從涇津南渡赴弘農九月司空高平公兒烏干
屯潼關平南將軍昌黎公元遼屯河內冬十月丙午朔
余爲宗愛所賊殿中尚書長孫渴侯與尚書陸麗迎立

皇孫是爲高宗焉帝生不逮密太后及有所識言則悲
慟哀感傍人太宗聞而嘉歎暨太宗不豫衣不釋帶性
清儉率素服御飲膳取給而已不好珍麗食不二味所
幸昭儀貴人衣無兼綵羣臣白帝更峻京邑城隍以從
周易設險之義又陳蕭何壯麗之說帝曰古人有言在
德不在險屈丐蒸土築城而朕滅之豈在城也今天下
未平方須民力土功之事朕所未爲蕭何之對非雅言
也每以財者軍國之本無所輕費至賞賜皆是死事勳
績之家親戚愛寵未曾橫有所及臨敵常與士卒同在
矢石之間左右死傷者相繼而帝神色自若是以人思

効命所向無前命將出師指授節度從命者無不制勝
違爽者率多敗失性又知人拔士於卒伍之中惟其才
效所長不論本末兼甚嚴斷明於刑賞功者賞不遺賊
罪者刑不避親雖寵愛之終不虧法常曰法者朕與天
下共之何敢輕也故大臣犯法無所寬假雅長聽察瞬
息之間下人無以措其姦隱然果於誅戮後多悔之司
徒崔浩既死之後帝北伐時宣城公李孝伯疾篤傳者
以爲卒也帝聞而悼之謂左右曰李宣城可惜又曰朕
向失言崔司徒可惜李宣城可哀褒貶雅意皆此類也
○恭宗景穆皇帝諱晃太武皇帝之長子也母賀夫人延

和元年春正月丙午立爲皇太子時年五歲明慧彊識
聞則不忘及長好讀經史皆通大義世祖甚奇之世祖
東征和龍詔恭宗錄尚書事西征涼州詔恭宗監國初
世祖之伐河西也李順等咸言姑臧無水草不可行師
恭宗有疑色及車駕至姑臧乃詔恭宗曰姑臧城東西
門外涌泉合於城北其大如河自餘溝渠流入澤中其
間乃無燥地澤草茂盛可供大軍數年人之多言亦可
惡也故有此勅以釋汝疑恭宗謂宮臣曰爲人臣不實
若此豈是忠乎吾初聞有疑但帝決行耳幾誤人大事
言者復何面見帝也真君四年恭宗從世祖討蠕蠕至

鹿渾谷與賊相遇虜惶怖部落擾亂恭宗言於世祖曰
今大軍卒至宜速進擊掩其不備破之必矣尚書令劉
潔固諫以爲塵盛賊多出至平地恐爲所圍須軍大集
然後擊之可也恭宗謂潔曰此塵之盛由賊恇擾軍人
亂故何有營上而有此塵世祖疑之遂不急擊蠕蠕遠
遁旣而獲虜候騎世祖問之對曰蠕蠕不覺官軍卒至
上下惶懼引衆北走經六七日知無追者始乃徐行世
祖深恨之自是恭宗所言軍國大事多見納用遂知萬
機初恭宗監國會令曰周書言任農以耕事貢九穀任
圃以樹事貢草木任工以餘材貢器物任商以市事貢

貨賄任牧以畜事貢鳥獸任嬪以女事貢布帛任衡以
山事貢其材任虞以澤事貢其物其制有司課畿內之
民使無牛家以人牛力相貿墾殖鋤耨其有牛家與無
牛家一人種田二十二畝償以私鋤功七畝如是爲差
至與小老無牛家種田七畝小老者償以鋤功二畝皆
以五口下貧家爲率各列家別口數所勸種頃畝明立
簿目所種者於地首標題姓名以辨播殖之功又禁飲
酒雜戲棄本沽販者墾田大爲增闢正平元年六月戊
辰薨於東宮時年二十四庚午冊曰嗚呼惟爾誕資明
叡岐嶷夙成正位少陽克荷基構賓于四門百揆時敘

允釐庶績風雨不迷宜享無疆隆我皇祚如何不幸奄
焉殂殞朕用悲慟于厥心今使使持節兼太尉張黎兼
司徒竇瑾奉策卽極賜諡曰景穆以顯昭令德魂而有
靈其尚嘉之高宗卽位追尊為景穆皇帝廟號恭宗
史臣曰世祖聰明雄斷威靈傑立藉二世之資奮征伐
之氣遂戎軒四出周旋險夷掃統萬平秦隴翦遼海盪
河源南夷荷檐北蠕削跡廓定四表混一戎華其為功
也大矣遂使有魏之業光邁百王豈非神叡經綸事當
命世至於初則東儲不終末乃豐成所忽固本貽防殆
弗思乎恭宗明德令聞夙世殂天其戾園之悼歎

魏書卷五

皇明朝列

承

初重

馬

魏書卷四下終

萬曆二十四年刊

命世至於
也大矣
河源
命世至於
亦思乎恭宗

魏書卷五

高宗紀第五

皇明朝列大夫國子監祭酒臣李廷機

承直郎國子監司業臣方從哲等奉

勅重校刊

高宗文成皇帝諱濬恭宗景穆皇帝之長子也母曰閼氏真君元年六月生於東宮帝少聰達世祖愛之常置左右號世嫡皇孫年五歲世祖北巡帝從在後逢虜帥桎一奴欲加其罰帝謂之曰奴今遭我汝宜釋之帥奉命解縛世祖聞之曰此兒雖小欲以天子自處意奇之既長風格異常每有大政常參決可否正平二年十月

戊申卽皇帝位於永安前殿大赦改年

興安元年冬十月以驃騎大將軍元壽樂爲太宰都督中外諸軍事錄尚書事尚書長孫渴侯爲尚書令加儀同三司十有一月丙子二人爭權金賜死癸未廣陽王建薨臨淮王譚薨甲申皇妣薨太尉張黎司徒古弼以議不合旨黜爲外都大官平南將軍宋子侯周怵進爵樂陵王南部尚書章安子陸麗爲平原王文武各加位一等壬寅追尊景穆太子爲景穆皇帝皇妣爲恭皇后尊保母常氏爲保太后隴西屠各王景文叛詔統萬鎮將南陽王惠壽討平之十有一月戊申祔葬恭皇后於

金陵乙卯初復佛法丁巳以樂陵王周怵爲太尉平原王陸麗爲司徒鎮西將軍杜元寶爲司空保達沙獵國各遣使朝獻戊寅建業公陸侯進爵東平王廣平公杜遺進爵爲王癸亥詔以營州蝗開倉賑恤甲子太尉樂陵王周怵有罪賜死濮陽公閭若文進爵爲王

二年春正月辛巳司空杜元寶進爵京兆王廣平王杜遺薨尚書僕射東安公劉尼進爵爲王封建寧王崇子麗爲濟南王癸未詔與民雜調十五丙戌尚書西平公源賀進爵爲王二月己未司空京兆王杜元寶謀反伏誅建寧王崇崇子濟南王麗爲元寶所引各賜死乙丑

發京師五千人穿天淵池是月劉義隆子劭殺其父而自立三月壬午尊保太后爲皇太后安豐公閭虎皮進爵爲河間王乙未疏勒國遣使朝獻夏五月乙酉行幸崞山辛卯還宮是月劉劭弟駿殺劭而自立閏月乙亥太皇太后赫連氏崩秋七月辛亥行幸陰山濮陽王閭若文征西大將軍永昌王仁謀反乙丑賜仁死於長安若文伏誅己巳車駕還宮是月築馬射臺於南郊八月辛未渴槃陁國遣使朝貢戊戌詔曰朕以眇身纂承大業懼不能宣慈惠和寧濟方寓夙夜兢兢若臨淵谷然卽位以來百姓晏安風雨順序邊方無事衆瑞兼呈不

可稱數又於苑內獲方寸玉印其文曰子孫長壽及公卿士咸曰休哉豈朕一人克臻斯應實由天地祖宗降祐之所致也思與兆庶共茲嘉慶其令民大酺三日諸殊死已下各降罪一等九月壬子閱武於南郊冬十有一月辛酉行幸信都中山觀察風俗十有二月誅河間鄭民爲賊盜者男年十五以下爲生口班賜從臣各有差甲午車駕還宮庫莫奚契丹蜀賓等十餘國各遣使朝貢復北平公長孫敷王爵

興光元年春正月乙丑以侍中河南公伊跋爲司空二月甲午帝至道壇登受圖籙禮畢曲赦京師班賞各有

差夏六月丙寅行幸陰山秋七月庚子皇子弘生辛丑
大赦改年八月甲戌趙王深薨乙亥車駕還宮巳丑皇
叔虎頭龍頭薨九月庚申庫莫奚國獻名馬有一角狀
如麟是月閉都城門大索三日獲姦人亡命數百人冬
十有一月北鎮將房杖擊蠕蠕虜其將豆渾與句等獲
馬千餘匹戊戌行幸中山遂幸信都十有二月丙子還
幸靈丘至溫泉宮庚辰車駕還宮出于叱萬單國各遣
使朝獻

太安元年春正月辛酉奉世祖恭宗神主于太廟車騎
大將軍樂平王拔有罪賜死二月癸未武昌王提薨三

月巳亥詔曰今始奉世祖恭宗神主于太廟又於西苑
遍秩羣神朕以大慶饗賜百寮而犯罪之人獨卽刑戮
非所以子育羣生矜及衆庶夫聖人之教自近及遠是
以周文刑於寡妻至于兄弟以御家邦化苟從近恩亦
宜然其曲赦京師死囚巳下夏六月壬戌詔名皇子曰
弘曲赦京城改年癸酉詔曰夫爲治者因宜以設官舉
賢以任職故上下和平民無怨謗若官非其人姦邪在
位則政教陵遲至於凋薄思明黜陟以隆治道今遣尚
書穆伏真等三十人巡行州郡觀察風俗入其境農不
墾殖田畝多荒則徭役不時廢於力也耆老飯蔬食少

壯無衣褐則聚斂煩數匱於財也閭里空虛民多流散
則緩導無方疎於恩也盜賊公行劫奪不息則威禁不
設失於刑也衆謗並興大小嗟怨善人隱伏佞邪當途
則爲法混淆昏於政也諸如此比黜而戮之善於政者
褒而賞之其有阿枉不能自申聽詣使告狀使者檢治
若信清能衆所稱美誣告以求直反其罪使者受財斷
察不平聽詣公車上訴其不孝父母不順尊長爲吏姦
暴及爲盜賊各具以名上其容隱者以所匿之罪罪之
是月遮逸國遣使朝貢戊寅帝畋於犢倪山甲申還宮
秋七月丙辰行幸河西八月丁亥車駕還宮冬十月汲

斯疏勒國並遣使朝貢庚午以遼西公常英爲太宰進
爵爲王

二年春正月乙卯立皇后馮氏二月丁巳立皇子弘爲
皇太子大赦天下丁零數千家亡匿井陘山聚爲寇盜
詔定州刺史許宗之并州刺史乞佛成龍討平之夏六
月羽林郎于判元提等謀逆伏誅秋八月甲申畋於河
西是月平西將軍漁陽公尉眷北擊伊吾克其城大獲
而還九月辛巳河東公閭毗零陵公閭紇並進爵爲王
冬十月甲申車駕還宮甲午曲赦京師十有一月尚書
西平王源賀改封隴西王猷噠會嵐國並遣使朝獻劉

魏書卷五 帝紀 五
駿濮陽太守姜龍駒新平太守楊伯倫各棄郡率吏民
來降

三年春正月壬戌畋於崞山戊辰還宮粟特于闐國各
遣使朝貢徵漁陽公尉眷拜太尉進爵爲王錄尚書事
夏五月庚申畋於松山己巳還宮封皇弟新成爲陽平
王六月癸卯行幸陰山秋八月畋於陰山之北己亥還
宮冬十月將東巡詔太宰常英起行宮於遼西黃山十
有一月蠻王文虎龍率千餘家內附十有二月以州鎮
五蝗民饑使使者開倉以賑之是月于闐扶餘等五十
餘國各遣使朝獻

四年春正月丙午朔初設酒禁乙卯行幸廣寧溫泉宮
遂東巡平州庚午至於遼西黃山宮遊宴數日親對高
年勞問疾苦二月丙子登碣石山觀滄海大饗羣臣於
山下班賞進爵各有差改碣石山爲樂遊山築壇記行
於海濱戊寅南幸信都畋遊於廣川三月丁未觀馬射
於中山所過郡國賜復一年丙辰車駕還宮起太華殿
乙丑東平王陸俟薨夏五月壬戌詔曰朕卽阼至今屢
下寬大之旨蠲除煩苛去諸不急欲令物獲其所人安
其業而牧守百里不能宣揚恩意求欲無厭斷截官物
以入於己使課調懸少而深文極墨委罪於民苛求免

咎曾不改懼國家之制賦役乃輕比年已來雜調減省而所在州郡咸有逋懸非在職之官綏導失所貪穢過度誰使之然自今常調不充民不安業宰民之徒加以死罪申告天下稱朕意焉六月丙申畋於松山秋七月庚午行幸河西九月乙巳還宮辛亥太華殿成丙寅饗羣臣大赦天下冬十月甲戌北巡至陰山有故塚毀廢詔曰昔姬文葬枯骨天下歸仁自今有穿毀墳壠者斬之劉駿將殷孝祖脩兩城於清水東詔鎮西將軍天水公封勅文等擊之辛卯車駕次于車輪山累石記行征西將軍皮豹子等二將二萬騎助擊孝祖車駕度漠蠕

蠕絕跡遠遁其別部烏朱賀頽庫世頽率衆來降十有二月征東將軍中山王託真薨

五年春正月己巳朔征西將軍皮豹子略地至高平大破孝祖斬獲五千餘級二月己酉侍中司空河南公伊馥薨三月庚寅曲赦京師死罪已下夏四月乙巳封皇弟子推爲京兆王五月居常國遣使朝獻六月戊申行幸陰山秋八月庚戌遂幸雲中壬戌還宮九月戊辰詔曰夫褒賞必於有功刑罰審於有罪此古今之所同由來之常式牧守莅民侵食百姓以營家業王賦不充雖歲滿去職應計前逋正其刑罪而主者失於督察不加

彈正使有罪者優游獲免無罪者妄受其辜是啓姦邪之路長貪暴之心豈所謂原情處罪以正天下自今諸遷代者仰列在職殿最案制治罪克舉者加之爵寵有愆者肆之刑戮使能否殊貫刑賞不差主者明爲條制以爲常楷儀同三司敦煌公李寶薨冬十有二月戊申詔曰朕承洪業統御羣有思恢政化以濟兆民故薄賦斂以實其財輕徭役以紓其力欲令百姓脩業人不匱乏而六鎮雲中高平二雍秦州徧遇災旱年穀不收其遣開倉廩以賑之有流徙者諭還桑梓欲市糴他界爲關傍郡通其交易之路若典司之官分職不均使上恩不達於下下民不贍於時加以重罪無有攸縱

和平元年春正月甲子朔大赦改元庚午詔散騎常侍馮闡使於劉駿二月衛將軍樂安王良督東雍吐京六壁諸軍西趣河西征西將軍皮豹子等督河西諸軍南趨石樓以討河西叛胡夏四月戊戌皇太后常氏崩於壽安宮五月癸酉葬昭太后於廣寧鳴鷄山六月甲午詔征西大將軍陽平王新成等督統萬高平諸軍出南道南郡公李惠等督涼州諸軍出北道討吐谷渾什寅崔浩之誅也史官遂廢至是復置河西叛胡詣長安首罪遣使者安慰之秋七月乙丑劉駿遣使朝貢壬午行

幸河西八月西征諸軍至西平什寅走保南山九月諸軍濟河追之遇瘴氣多有疫疾乃引軍還獲畜二十餘萬庚午輿駕還宮冬十月居常王獻馴象三十有一月詔散騎侍郎盧度世員外郎朱安興使於劉駿

二年春正月乙酉詔曰刺史牧民爲萬里之表自頃每因發調逼民假貸大商富賈要射時利旬日之間增贏十倍上下通同分以潤屋故編戶之家困於凍餒豪富之門日有兼積爲政之弊莫過於此其一切禁絕犯者十疋以上皆死布告天下咸令知禁二月辛卯行幸中山丙午至於鄴遂幸信都三月劉駿遣使朝貢輿駕所

過皆親對高年問民疾苦詔民年八十以上一子不從役靈丘南有山高四百餘丈乃詔羣官仰射山峰無能踰者帝彎弧發矢出山三十餘丈過山南二百二十步遂刊石勒銘是月發并肆州五千人治河西徼道辛巳輿駕還宮夏四月乙未侍中征東大將軍河東王閭毗薨五月癸未詔南部尚書黃盧頭李敷等考課諸州秋七月戊寅封皇弟小新成爲濟陰王加征東大將軍鎮平原天賜爲汝陰王加征南大將軍鎮虎牢萬壽爲樂浪王加征北大將軍鎮和龍洛侯爲廣平王壬午行巡山北八月戊辰波斯國遣使朝獻丁丑輿駕還宮冬十

魏書卷五 帝紀 九
月詔假員外散騎常侍游明根員外郎昌邑侯和天德
使于劉駿博陵之深澤章武之東州盜殺縣令州軍討
平之廣平王洛侯薨

三年春正月壬午以車騎大將軍東郡公乙渾爲太原
王癸未樂浪王萬壽薨二月癸酉攻于崞山遂觀漁于
旋鴻池三月甲申劉駿遣使朝貢高麗徒玉契嚙思厭
於師疏勒石那悉居半渴槃陀諸國各遣使朝獻夏六
月庚申行幸陰山詔將軍陸真討雍州叛氏仇儻檀等
平之秋七月壬寅幸河西九月壬辰征西大將軍常山
王素薨冬十月丙辰詔曰朕承洪緒統御萬國垂拱南

面委政羣司欲緝熙治道以致寧一夫三代之隆莫不
崇尚年齒今選舉之官多不以次令班白處後晚進居
先豈所謂寡倫攸敘者也諸曹選補宜各先盡勞舊才
能是月詔員外散騎常侍游明根員外郎昌邑侯和天
德使于劉駿十有一月壬寅興駕還宮十有二月乙卯
制戰陳之法十有餘條因大讎耀兵有飛龍騰蛇魚麗
之變以示威武戊午零陵王閭拔薨

四年春三月乙未賜京師民年七十以上太官厨食以
終其年皇子胡仁薨追封樂陵王乙巳詔曰朕憲章舊
典分職設官欲令敷揚治化緝熙庶績然在職之人皆

蒙顯擢委以事任當厲已竭誠務省徭役使兵民優逸
家給人贍今內外諸司州鎮守宰侵使兵民勞役非一
自今擅有召役逼雇不程皆論同枉法夏四月癸亥上
幸西苑親射虎三頭五月壬辰侍中漁陽王尉眷薨壬
寅行幸陰山秋七月壬午詔曰朕每歲以秋日閑月命
羣官講武平壤所幸之處必立宮壇糜費之功勞損非
一宜仍舊貫何必改作也八月丙寅遂改于河西詔曰
朕順時畋獵而從官殺獲過度既殫禽獸乖不合圍之
義其勅從官及典圍將校自今已後不聽濫殺其畋獲
皮肉別自頒賚壬申詔曰前以民遭饑寒不自存濟有

賣鬻男女者盡仰還其家或因緣勢力或私行請託共
相通容不時檢校令良家子息仍爲奴婢今仰精究不
聽取贖有犯加罪若仍不檢還聽其父兄上訴以掠人
論九月辛巳車駕還宮冬十月以定相二州實霜殺稼
免民田租是月詔員外散騎常侍游明根驍騎將軍昌
邑子婁內近寧朔將軍襄平子李五麟使于劉駿十有
二月辛丑詔曰名位不同禮亦異數所以殊等級示軌
儀今喪葬嫁娶大禮未備貴勢豪富越度奢靡非所謂
式昭典憲者也有司可爲之條格使貴賤有章上下咸
序著之于令壬寅詔曰夫婚姻者人道之始是以夫婦

之義三綱之首禮之重者莫過於斯尊卑高下宜令區別然中代以來貴族之門多不率法或貪利財賄或因緣私好在於苟合無所選擇令貴賤不分巨細同貫塵穢清化虧損人倫將何以宣示典謨垂之來裔今制皇族師傅王公侯伯及士民之家不得與百工伎巧卑姓爲婚犯者加罪

五年春正月丁亥封皇弟雲爲任城王二月詔以州鎮十四去歲蟲水開倉賑恤夏四月癸卯頓丘公李峻進爵爲王閏月戊子帝以旱故減膳責躬是夜澍雨大降五月庚申劉駿死子子業僭立六月丁亥行幸陰山秋

七月辛丑北鎮游軍大破蠕蠕壬寅行幸河西九月辛丑車駕還宮冬十月琅邪王司馬楚之薨十有二月南秦王楊難當薨吐呼羅國遣使朝獻

六年春正月丙申大赦天下二月丁丑行幸樓煩宮高麗徙王對曼諸國各遣使朝獻三月戊戌相州刺史西平郡王吐谷渾權薨乙巳車駕還宮夏四月破洛那國獻汗血馬晉嵐國獻寶劍五月癸卯帝崩于太華殿時年二十六六月丙寅上尊諡曰文成皇帝廟號高宗八月葬雲中之金陵

史臣曰世祖經略四方內頗虛耗旣而國豐時艱朝野

楚楚高宗與時消息靜以鎮之養威布德懷緝中外自
非機悟深裕矜濟爲心亦何能若此可謂有君人之度
矣

魏書卷五終

魏書卷六

顯祖紀第六

皇明朝列大夫國子監祭酒臣李廷機

承直郎國子監司業臣方從哲等奉

勅重校刊

顯祖獻文皇帝諱弘高宗文成皇帝之長子也母曰李
貴人興光元年秋七月生於陰山之北太安二年二月
立爲皇太子聰睿機悟幼而有濟民神武之規仁孝純
至禮敬師友和平六年夏五月甲辰卽皇帝位大赦天
下尊皇后曰皇太后車騎大將軍乙渾矯詔殺尚書楊
保年平陽公賈愛仁南陽公張天度于禁中戊申侍中

司徒平原王陸麗自湯泉入朝渾又殺之巴西以待中
車騎大將軍乙渾爲太尉錄尚書事東安王劉尼爲司
徒尚書左僕射和其奴爲司空壬子以淮南王他爲鎮
西大將軍儀同三司鎮涼州六月封繁陽侯李嶷爲丹
陽王征東大將軍馮熙爲昌黎王乙丑詔曰夫賦歛煩
則民財匱課調輕則用不足是以十一而稅頌聲作矣
先朝權其輕重以惠百姓朕承洪業上惟祖宗之休命
夙興待旦惟民之恤欲令天下同於逸豫而徭賦不息
將何以塞煩去苛拯濟黎元者哉今兵革不起畜積有
餘諸有雜調一以與民秋七月癸巳大尉乙渾爲丞相

位居諸王上事無大小皆決於渾九月庚子曲赦京師
丙午詔曰先朝以州牧親民宜置良佐故勅有司班九
條之制使前政選吏以待俊乂必謂銓衡允衷朝綱應
敘然牧司寬情不祇憲旨舉非其人愆于典度今制刺
史守宰到官之日仰自舉民望忠信以爲選官不聽前
政共相干冒若簡任失所以罔上論是月劉子業征北
大將軍義陽王劉昶自彭城來降冬十月徵陽平王新
成京兆王子推濟陰王小新成汝陰王天賜任城王雲
入朝是歲劉子業叔父彧殺子業僭立

天安元年春正月巳丑朔大赦改年二月庚申丞相太

原王乙渾謀反伏誅乙亥以待中元孔雀為濮陽王侍
 中陸定國為東郡王三月庚子以隴西王源賀為太尉
 辛丑高宗文成皇帝神主祔于太廟辛亥帝幸道壇親
 受符籙曲赦京師高麗波斯于闐阿襲諸國遣使朝獻
 秋七月闕二詔諸有詐取爵位罪特原之削其爵職其
 有祖父假爵號貨賂以正名者不聽繼襲諸非勞進超
 遷者亦各還初不以實聞者以大不敬論九月劉彧司
 州刺史常珍奇以懸瓠內屬已酉初立鄉學郡置博士
 二人助教二人學生六十人劉彧徐州刺史薛安都以
 彭城內屬彧將張永沈攸之擊安都詔北部尚書尉元

為鎮南大將軍都督諸軍事鎮東將軍城陽公孔伯恭
 為副出東道救彭城殿中尚書鎮西大將軍西河公元
 石都督荆豫南雍州諸軍事給事中京兆侯張窮奇為
 副出西道救懸瓠冬十月曹利彤曷國各遣使朝獻十
 有一月壬子劉彧兗州刺史畢眾敬遣使內屬十有二
 月己未尉元軍次于花彧將周凱張永沈攸之相繼退
 走皇弟安平薨是歲州鎮十一旱民饑開倉賑恤
 皇興元年春正月癸巳尉元大破張永沈攸之於呂梁
 東斬首數萬級凍死者甚眾獲劉彧秦州刺史垣恭祖
 羽林監沈承伯永攸之單騎走免獲軍資器械不可勝

數劉彧遣使朝貢庚子東平王道符謀反於長安殺副將駙馬都尉萬古真鉅鹿公李恢雍州刺史魚玄明丙午詔司空平昌公和其奴東陽公元丕等討道符丁未道符司馬段太陽攻道符斬之傳首京師道符兄弟皆伏誅閏月以頓丘王李峻爲太宰劉彧青州刺史沈文秀冀州刺史崔道固並遣使請舉州內屬詔平東將軍長孫陵平南將軍廣陵公侯窮奇赴援之二月詔使持節都督諸軍事征南大將軍慕容白曜督騎五萬次於高碣爲東道後援濟陰王小新成薨高麗庫莫奚具伏弗郁羽陵日連匹黎爾于闐諸國各遣使朝貢劉彧東平太守申纂戍無鹽遇絕王使詔征南大將軍慕容白曜督諸軍以討之三月甲寅尅之沈文秀崔道固復叛歸劉彧白曜回師討之拔彧肥城垣苗麋溝三戍夏四月白曜攻升城戍王房崇吉遁走秋八月白曜攻歷城丁酉行幸武州山石窟寺戊申皇子宏生大赦改年九月壬子高麗于闐普嵐粟特國各遣使朝獻丁巳進馮翊公李白爵梁郡王是月詔賜六鎮貧人布人三匹冬十月癸卯田於那男池濮陽王孔雀坐怠慢降爵爲公二年春二月癸未田于西山親射虎豹崔道固及劉彧梁鄒戍主平原太守劉休賓舉城降是月徐州羣盜司

魏書卷六
帝紀 四
馬休符自稱晉王將軍尉元討平之三月白曜進圍東陽戊午劉彧遣使朝貢夏四月辛丑以南郡公李惠爲征南大將軍儀同三司都督關右諸軍事雍州刺史進爵爲王高麗庫莫奚契丹具伏弗郁羽陵日連匹黎爾叱六手悉萬丹阿大何羽真侯于闐波斯國各遣使朝獻五月乙卯田于崞山遂幸繁峙辛酉還宮六月庚辰以河南關地曲赦京師殊死以下以昌黎王馮熙爲太傅秋九月辛亥封皇叔植爲南安王長壽爲城陽王太洛爲章武王休爲安定王冬十月辛丑上田於冷泉十有一月以州鎮二十七水旱開倉賑恤十有二月甲午

詔曰頃張永迷擾敢拒王威暴骨原隰殘廢不少死生寃痛朕甚愍焉天下民一也可勅郡縣永軍殘廢之士聽還江南露骸草莽者收瘞之是月悉萬丹等十餘國各遣使朝貢

三年春正月乙丑東陽潰虜沈文秀戊辰司空平昌公和其奴薨二月蠕蠕高麗庫莫奚契丹國各遣使朝獻已卯以上黨公慕容白曜爲都督青齊東徐三州諸軍事征南大將軍開府儀同三司青州刺史進爵濟南王夏四月壬辰劉彧遣使朝貢丙申名皇子曰宏大赦天下丁酉田于崞山五月徙青州民於京師六月辛未立

皇子宏爲皇太子秋七月蠕蠕國遣使朝貢冬十月侍中太宰頓丘王李峻薨十有一月吐谷渾別帥白楊提度汗率戶內附襄城公韓頽進爵爲王

四年春正月詔州鎮十一民饑開倉賑恤二月以東郡主陸定國爲司空高麗庫莫奚契丹各遣使朝獻吐谷渾拾寅不供職貢詔使持節征西大將軍上黨王長孫觀討之廣陽王石侯薨二月丙戌詔曰朕思百姓病苦民多非命明發不寐疚心疾首是以廣集良醫遠採名藥欲以救護兆民可宣告天下民有病者所在官司遣醫就家診視所須藥物任醫量給之夏四月辛丑大赦

天下戊申長孫觀軍至曼頭山大破拾寅拾寅與麾下數百騎宵遁拾寅從弟豆勿來及其渠帥匹婁拔累等率所領降附五月封皇弟長樂爲建昌王六月劉彧遣使朝貢秋八月羣盜入彭城殺鎮將元解愁長史勒兵滅之蠕蠕犯塞九月丙寅輿駕北伐諸將俱會于女水大破虜衆事具蠕蠕傳司徒東安王劉尼坐事免壬申車駕至自北伐飲至策勳告於宗廟冬十月誅濟南王慕容白曜高平公李敷十有一月詔弛山澤之禁十有二月甲辰幸鹿野苑石窟寺陽平王新成薨五年春三月乙亥詔曰天安以來軍國多務南定徐方

北掃遺虜征戍之人亡竄非一雖罪合刑書每加哀宥然寬政猶水逋逃遂多宜申明典刑以肅姦偽自今諸有逃亡之兵及下代守宰浮游不赴者限六月三十日悉聽歸首不首者論如律詔假員外散騎常侍邢祐使於劉彧夏四月西部勅勒叛詔汝陰王天賜給事中羅雲討之雲爲勅勒所襲殺死者十五六北平王長孫敦薨六月丁未行幸河西秋七月丙寅遂至陰山八月丁亥車駕還宮帝雅薄時務常有遺世之心欲禪位於叔父京兆王子推語在任城王雲傳羣臣固請帝乃止丙午冊命太子曰昔堯舜之禪天下也皆由其子不肖若

丹朱商均能負荷者豈搜揚仄陋而授之哉爾雖沖弱有君人之表必能恢隆王道以濟兆民今使太保建安王陸馭太尉源賀持節奉皇帝璽綬致位於爾躬其踐昇帝位克廣洪業以光祖宗之烈使朕優游履道願神養性可不善歟丁未詔曰朕承洪業運屬太平淮岱率從四海清晏是以希心玄古志存澹泊躬覽萬務則損願神之和一日或曠政有淹滯之失但子有天下歸尊於父父有天下傳之於子今稽協靈運考會羣心爰命儲宮踐昇大位朕方優遊恭已栖心浩然社稷乂安克廣其業不亦善乎百官有司其祇奉胤子以答天休宣

布寓內咸使聞悉於是羣公奏曰昔三皇之世澹泊無
爲故稱皇是以漢高祖旣稱皇帝尊其父爲太上皇明
不統天下今皇帝幼冲萬機大政猶宜陛下總之謹上
尊號太上皇帝乃從之巳酉太上皇帝徙御崇光宮採
椽不斲土階而巳國之大事咸以聞承明元年年二十
三崩於永安殿上尊諡曰獻文皇帝廟號顯祖葬雲中
金陵

史臣曰聰叡夙成兼資能斷其顯祖之謂乎故能更清
漠野大啓南服而早懷厭世之心終致宮闈之變將天
意哉

魏書卷六終

魏書卷七上

高祖紀第七上

皇明朝列大夫國子監祭酒臣李延機

承直郎國子監司業臣方從哲等奉

勅重校刊

高祖孝文皇帝諱宏顯祖獻文皇帝之長子母曰李夫人
 皇興元年八月戊申生於平城紫宮神光照於室內
 天地氛氲和氣充塞帝生而潔白有異姿襁褓岐嶷長
 而淵裕仁孝綽然有君人之表顯祖尤愛異之三年夏
 六月辛未立為皇太子五年秋八月丙午即皇帝位於
 太華前殿大赦改元延興元年丁未劉彧遣使朝貢九

月壬戌詔在位及民庶直言極諫有利民益治損政傷化悉心以聞壬午青州高陽民封辯自號齊王聚黨千餘人州軍討滅之高麗民奴乂等相率來降各賜田宅冬十月丁亥沃野統萬二鎮勅勒叛詔太尉隴西王源賀追擊至枹罕滅之斬首三萬餘級徙其遺迸於冀定相三州爲營戶庚寅以征東大將軍南安王楨爲假節都督涼州及西戎諸軍事領護西域校尉儀同三司鎮涼州朔方民曹平原招集不逞破石樓堡殺軍將劉彧將坦崇祖率衆二萬自郁洲寇東兗州屯于南城固十有一月刺史于洛侯討破之崇祖還郁洲妖賊司馬小

君聚衆反於平陵齊州刺史武昌王平原討擒之十有二月乙酉以駙馬都尉穆亮爲趙郡王壬辰詔訪舜後獲東萊郡民媯苟之復其家畢世以彰盛德之不朽復前濮陽王孔雀本封辛丑趙郡王穆亮徙封長樂王二年春正月乙卯統萬鎮胡民相率北叛詔寧南將軍交趾公韓拔等追滅之大陽蠻酋桓誕率戶內屬拜征南將軍封襄陽王曲赦京師及河西南至秦涇西至枹罕北至涼州諸鎮詔假員外散騎常侍邢祐使於劉彧二月乙巳詔曰尼父稟達聖之姿體生知之量窮理盡性道光四海頃者淮徐未賓廟隔非所致令祠典寢頓

禮章殄滅遂使女巫妖覲淫進非禮殺生鼓舞倡優媒
 狎豈所以尊明神敬聖道者也自今已後有祭孔子廟
 制用酒脯而已不聽婦女合雜以祈非望之福犯者以
 違制論其公家有事自如常禮犧牲粢盛務盡豐潔臨
 事致敬令肅如也牧司之官明糾不法使禁令必行蠕
 蠕犯塞太上皇帝次於北郊詔諸將討之虜遁走其別
 帥阿大千率千餘落來降東部勅勒叛奔蠕蠕太上皇
 帝追之至石磧不及而還壬子高麗國遣使朝貢三月
 太上皇帝至自北討戊辰以散騎常侍駙馬都尉萬安
 國為大司馬大將軍封安城王庚午車駕耕於籍田石

城郡獲曹平原送京師斬之連川敕勒謀叛徙配青徐
 齊兗四州為營戶夏四月庚子詔工商雜伎盡聽赴農
 諸州郡課民益種菜果辛亥劉彧遣使朝貢癸酉詔沙
 門不得去寺浮遊民間行者仰以公文是月劉彧死子
 昱僭立五月丁巳詔軍警給璽印傳符次給馬印六月
 安州民遇水雹丙租賑恤丙申詔曰頃者州郡選貢多
 不以實碩人所以窮處幽仄鄙夫所以超分妄進豈所
 謂旌賢樹德者也今年貢舉尤為猥濫自今所遣皆門
 盡州郡之高才極鄉閭之選閏月壬子蠕蠕寇敦煌鎮
 將尉多侯擊走之又寇晉昌守將薛奴擊走之戊午行

幸陰山秋七月光州民孫晏等聚黨千餘人叛通劉昱
刺史叔孫瓚討平之辛丑高麗國遣使朝貢壬寅詔州
郡縣各遣二人才堪專對者赴九月講武當親問風俗
八月丙辰百濟國遣使奉表請師伐高麗辛酉地豆于
庫莫奚國遣使朝貢昌亭國遣使獻蜀馬河西費也頭
反薄骨律鎮將擊走之九月辛巳車駕還宮戊申統萬
鎮將河間王閭虎皮坐貪殘賜死巳酉詔以州鎮十一
水巧民田租開倉賑恤又詔流徙之民皆令還本違者
配徙邊鎮冬十月蠕蠕犯塞及於五原十有一月太上
皇帝親討之將度漠襲擊蠕蠕聞軍至大懼北走數千

里以窮寇遠遁不可追乃止丁亥封皇叔略爲廣川王
壬辰分遣使者巡省風俗問民疾苦帝每月一朝崇光
宮十有二月庚戌詔曰書云三載一考三考黜陟幽明
頃者已來官以勞升未久而代牧守無恤民之心競爲
聚斂送故迎新相屬於路非所以固民志隆治道也自
今牧守溫仁清儉克已奉公者可久於其任歲積有成
遷位一級其有貪殘非道侵削黎庶者雖在官南爾必
加黜罰著之於令永爲彝準詔以代郡事同豐沛代民
先配邊戍者皆免之

三年春正月庚辰詔員外散騎常侍崔演使於劉昱丁

亥改崇光宮爲寧光宮戊戌太上皇帝還至雲中是月
相州執送妖人榮永安於京師斬之詔赦其支黨二月
戊申高麗契丹國並遣使朝貢癸丑詔牧守令長勤率
百姓無令失時同部之內貧富相通家有兼牛通借無
者若不從詔一門之內終身不仕守宰不督察免所居
官戊午太上皇帝至自北討飲至策勳告於宗廟死王
事者復其家詔畿內民從役死事者郡縣爲迎喪給以
葬費甲戌詔縣令能靜一縣劫盜者兼治二縣卽食其
祿能靜二縣者兼治三縣三年遷爲郡守二千石能靜
二郡上至三郡亦如之三年遷爲刺史三月壬午詔諸

倉囤穀麥充積者出賜貧民夏四月戊申詔假司空上
黨王長孫觀等討吐谷渾拾寅壬子契丹國遣使朝貢
詔以孔子二十八世孫魯郡孔乘爲崇聖大夫給十戶
以供洒埽六月甲子詔曰往年縣召民秀二人問以守
宰治狀善惡具聞將加賞罰而賞者未幾罪者衆多肆
法傷生情所未忍今特垂寬恕之恩申以解網之惠諸
爲民所列者特原其罪盡可代之秋七月詔河南六州
之民戶收絹一匹綿一斤租三十石乙亥行幸陰山蠕
蠕寇敦煌鎮將樂洛生擊破之事具蠕蠕傳劉昱遣將
寇緣淮諸鎮徐州刺史淮陽公尉元擊走之八月己酉

高麗庫莫奚國並遣使朝獻庚申帝從太上皇帝幸河西拾寅謝罪請降許之九月辛巳車駕並還宮乙亥劉昱遣使朝貢己亥詔曰自今京師及天下之囚罪未分判在獄致死無近親者公給衣衾棺槨葬埋之不得曝露辛丑詔遣使者十人循行州郡檢括戶口其有仍隱不出者州郡縣戶主並論如律庫莫奚國遣使朝獻冬十月太上皇帝親將南討詔州郡之民十丁取一以充行戶收租五十石以備軍糧悉萬斤國遣使朝獻武都王反攻仇池詔長孫觀仍回師討之十有一月戊寅詔以河南七州牧守多不奉法致新邦之民莫能上達遣

使者觀風察獄黜陟幽明其有鰥寡孤獨貧不自存者復其雜徭年八十已上一子不從役力田孝悌才器有益於時信義著於鄉閭者具以名聞癸巳太上皇帝南巡至於懷州所過問民疾苦賜高年孝悌力田布帛十有二月庚戌詔關外苑囿聽民樵採壬子蠕蠕犯邊柔玄鎮二部勅勒叛應之癸丑沙門慧隱謀反伏誅是歲州鎮十一水旱丐民田租開倉賑恤相州民餓死者二千八百四十五人吐谷渾部內羌民鍾豈渴干等二千三百戶內附是年妖人劉舉自稱天子齊州刺史武昌王平原捕斬之

四年春正月丁丑侍中太尉隴西王源賀以病辭位辛巳粟特國遣使朝獻二月甲辰太上皇帝至自南巡辛亥吐谷渾拾寅遣子費斗斤入侍并獻方物辛未禁斷寒食三月丁亥詔員外散騎常侍許赤虎使於劉昱高麗吐谷渾曹利諸國各遣使朝貢夏五月甲戌蠕蠕國遣使朝貢六月乙卯詔曰朕應歷數開一之期屬千載光熙之運雖仰嚴誨猶懼德化不寬至有門房之誅然下民兇戾不顧親戚一人爲惡殃及合門朕爲民父母深所愍悼自今以後非謀反大逆干紀外奔罪止其身而已今德被殊方文軌將一宥刑寬禁不亦善乎闕悉

國遣使朝貢秋七月庚午高麗國遣使朝獻已卯曲故仇池癸巳蠕蠕寇敦煌鎮將尉多侯大破之八月庚子吐谷渾國遣使朝獻戊申大閱於北郊九月以劉昱內相攻戰詔將軍元蘭等五將三萬騎及假東陽王不爲後繼伐蜀漢丙子契丹庫莫奚地豆干諸國各遣使朝獻冬十月庚子劉昱遣使朝貢十有一月分遣侍臣循河南七州觀察風俗撫慰初附戊寅吐谷渾國遣使朝獻是歲州鎮十三大飢丐民田租開倉賑之十有二月詔西征吐谷渾兵在句律城初叛軍者斬次分配柔玄武川二鎮斬者千餘人

五年春二月庚子高麗國遣使朝獻癸丑詔定考課明黜陟閏月戊午吐谷渾國遣使朝獻夏四月丁丑龜茲國遣使朝獻癸未詔天下賦調縣專督集牧守對檢送京師違者免所居官詔禁畜鷹鷄開相告之制五月丁酉契丹庫莫奚國各遣使獻名馬丙午詔員外散騎常侍許武虎使於劉昱丁未幸武州山辛酉幸車輪山六月庚午禁殺牛馬壬申曲赦京師死罪遣備蠕蠕秋八月丁卯高麗吐谷渾地豆于諸國遣使朝獻九月癸卯洛州人賈伯奴豫州人田智度聚黨千餘人伯奴稱恒農王智度稱上洛王夜攻洛州州郡擊之斬伯奴於緱

氏執智度送京師冬十月蠕蠕國遣使朝獻太上皇帝大閱於北郊十有二月丙寅建昌王長樂改封安樂王己丑城陽王長壽薨庚寅劉昱遣使朝貢

承明元年春二月蠕蠕高麗庫莫奚波斯諸國並遣使朝貢是月司空東郡王陸定國坐事免官爵爲兵夏五月冀州武邑民宋伏龍聚衆自稱南平王郡縣捕斬之蠕蠕國遣使朝貢六月甲子詔中外戒嚴分京師見兵爲三等第一軍出遣第一兵二等兵亦如之辛未太上皇帝崩壬申大赦改年大司馬大將軍安城王萬安國坐矯詔殺神部長奚買奴於苑中賜死戊寅征西大將

軍安樂王長樂爲太尉尚書左僕射南平公日辰爲司徒進封宜都王南部尚書李訢爲司空尊皇太后爲太皇太后臨朝稱制秋七月甲辰追尊皇妣李貴人爲思皇后以汝陰王天賜爲征西大將軍儀同三司高麗庫莫奚國並遣使朝貢濮陽王孔雀有罪賜死八月甲子詔曰朕猥承前緒纂戎洪烈思隆先志緝熙政道羣公卿士其各勉厥心匡朕不逮諸有便民利國者具狀以聞壬午蠕蠕國遣使朝貢甲申以長安二蠶多死丐民歲賦之半九月丁亥曲赦京師高麗庫莫奚契丹諸國並遣使朝獻癸丑宥昌悉萬斤國並遣使朝貢冬十月

丁巳起七寶永安行殿乙丑進征西大將軍假東陽王元丕爵爲正王己未詔曰朕纂承皇極照臨萬方思聞遐風光被兆庶使朝有不諱之音野無自蔽之響疇咨帝載詢及芻蕘自今已後羣官卿士下及吏民各聽上書直言極諫勿有所隱諸有便宜益治利民可以正風俗者有司以聞朕將親覽與三事大夫論其可否裁而用之辛未輿駕幸建明佛寺大宥罪人濟南公羅拔進爵爲王十有一月蠕蠕國遣使朝貢戊子以太尉安樂王長樂爲定州刺史京兆王子推爲青州刺史司空李訢爲徐州刺史並開府儀同三司

太和元年春正月乙酉朔詔曰朕夙承寶業懼不堪荷而天貺具臻地瑞金應風和氣晚天人交協豈朕沖昧所能致哉實賴神祇七廟降福之助今三正告初祇感交切宜因陽始協典革元其改今號爲太和元年辛亥詔曰今牧民者與朕共治天下也宜簡以徭役先之勸獎相其水陸務盡地利使農夫外布桑婦內勤若輕有徵發致奪民時以侵擅論民有不從長教惰於農桑者加以罪刑起太和安昌二殿巳酉秦州略陽民王元壽聚衆五千餘家自號爲衝天王雲中飢開倉賑恤二月丙寅漢川民泉會譚酉等相率內屬處之并州辛未秦

益二州刺史武都公尉洛侯討破元壽獲其妻子送京師癸未高麗契丹庫莫奚國各遣使朝獻三月庚子徵征西大將軍雍州刺史東陽王丕爲司徒丙午詔曰朕政治多闕災青屢興去年生疫死傷大半耕墾之利當有虧損今東作旣興人須肄業其勅在所督課田農有牛者加勤於常歲無牛者倍庸於餘年一夫制治田四十畝中男二十畝無令人有餘力地有遺利庫莫奚契丹國各遣使朝獻夏四月丙寅蠕蠕國遣使朝貢丁卯幸白登山壬申幸崢山樂安王良薨詔復前東郡王陸定國官爵五月乙酉車駕祈雨於武州山俄而澍雨大

洽蠕蠕國遣使朝貢秋七月壬辰侍中開府儀同三司
青州刺史京兆王子推薨庚子定三等死刑己酉太和
安昌二殿成起朱明思賢門是月劉昱死弟準僭立八
月壬子大赦天下丙子詔曰工商皂隸各有厥分而有
司縱濫或深清流自今戶內有工役者推上本部丞已
下準次而授若階藉元勳以勞定國者不從此制戊寅
劉準遣使朝貢九月癸未蠕蠕國遣使朝貢乙酉詔羣
臣定律令於太華殿辛卯高麗國遣使朝貢庚子起永
樂遊觀殿於北苑穿神淵池車多羅西天竺舍衛豐伏
羅諸國各遣使朝貢冬十月癸酉宴京邑耆老年七十

已上於太華殿賜以衣服是月庫莫奚契丹國各遣使
朝獻又詔七十已上一子不從役龜茲國遣使朝獻劉
準葭蘆戍主楊文度遣弟鼠襲陷仇池丙子誅徐州刺
史李訢庫莫奚契丹國各遣使朝貢十有二月癸未詔
征西將軍廣川公皮邏喜鎮西將軍梁醜奴平西將軍
楊靈珍等率衆四萬討楊鼠乙酉吐谷渾國遣使朝獻
丁亥懷州民伊祁苟初自稱堯後應王聚衆於重山洛
州刺史馮熙討滅之閏月權喜等軍到建安楊鼠棄城
南走癸亥粟提婆國遣使朝獻庚子詔員外散騎常侍
李長仁使於劉準十有二月壬寅權喜攻陷葭蘆斬文

度傳首京師甲辰員闞吐谷渾國金遣使朝貢丁未詔以州郡入水旱蝗民飢開倉賑恤以安定王休爲儀同三司

二年春正月丁巳封昌黎王馮熙第二子始興爲北平王戊午吐谷渾遣使朝獻二月丁亥行幸代之湯泉所過問民疾苦以宮人賜貧民無妻者戊戌蠕蠕國遣使朝獻癸卯車駕還宮三月丙子以河南公梁彌機爲宕昌王夏四月甲申幸崞山丁亥還宮己丑劉準遣使朝貢京師蝗甲辰祈天災於北苑親自禮焉減膳避正殿丙午澍雨大洽曲赦京師五月詔曰婚媾過禮則嫁娶

有失時之弊厚葬送終則生者有糜費之苦聖王知其如此故申之以禮數約之以法禁廼者民漸奢尚婚葬越軌致貧富相高貴賤無別又皇族貴戚及士民之家不惟氏族高下與非類婚偶先帝親發明詔爲之科禁而百姓習常仍不肅改朕今憲章舊典祇案先制著之律令永爲定準犯者以違制論六月己丑幸鹿野苑庚子皇叔若薨秋七月戊辰龜茲國遣使獻名駒七十頭劉準遣將寇仇池陰平太守楊廣香擊走之八月分遣使者考察守宰問民疾苦丙戌詔罷諸州禽獸之貢丁亥勿吉國遣使朝獻九月丙辰曲赦京師龜茲國遣使

獻大馬名駒珍寶甚衆冬十月壬辰詔員外散騎常侍
鄭羲使於劉準十有一月庚戌詔曰懸爵於朝而有功
者必縻其賞懸刑於市而有罪者必罹其辜斯乃古今
之成典治道之實要諸州刺史牧民之官自頃以來遂
各怠慢縱姦納賂背公緣私致令賊盜並興侵劫滋甚
姦宄之聲屢聞朕聽朕承太平之運屬千載之期恩光
洪緒惟新庶績亦望蕃翰羣司敷德宣惠以助沖人共
成斯美幸克已復禮思愆改過使寡昧無愧於祖宗百
姓見德於當世有司明爲條禁稱朕意焉十有一月癸巳
誅南郡王李惠是歲州鎮二十餘水旱民飢開倉賑恤

三年春正月癸丑坤德六合殿成庚申詔罷行察官二
月辛巳帝太皇太后幸代郡溫泉問民疾苦鰥貧者以
宮女妻之己亥還宮壬寅乾象六合殿成三月甲辰曲
赦京師戊午吐谷渾高麗國各遣使朝獻夏四月壬申
劉準遣使朝獻癸未樂浪王樂平薨辛卯蠕蠕國遣使
朝獻丙申幸崑山己亥還宮庚子淮陽公尉元進爵爲
王吐谷渾國遣使獻犛牛五十頭雍州刺史宜都王目
辰有罪賜死五月丁巳帝祈雨於北苑閉陽門是日澍
雨大洽辛酉詔曰昔四代養老問道乞言朕雖沖昧每
尚其美今賜國老各衣一襲綿五斤絹布各五疋六月

辛未以雍州民飢開倉賑恤起文石室靈泉殿於方山
秋七月壬寅詔宮人年老及疾病者免之八月壬申詔
羣臣直言盡規靡有所隱乙亥幸方山起思遠佛寺丁
丑還宮九月壬子以侍中司徒東陽王丕爲太尉侍中
尚書右僕射趙郡公陳建爲司徒進爵魏郡王侍中尚
書河南公苟頽爲司空進爵河東王侍中尚書太原公
王叡進爵中山王侍中尚書隴東公張祐進爵新平王
己未定州刺史安樂王長樂有罪徵詣京師賜死庚申
隴西王源賀薨高麗吐谷渾地豆于契丹庫莫奚龜茲
諸國各遣使朝獻冬十月己巳朔大赦天下十有一月

癸卯賜京師貧窮高年疾患不能自存者衣服布帛各
有差癸丑進假梁郡公元嘉爵爲假王督二將出淮陰
隴西公元琛三將出廣陵河東公薛虎子三將出壽春
蠕蠕率騎十餘萬南寇至塞而還十有二月粟特州逸
河龔疊伏羅員闕悉萬斤諸國各遣使朝貢是年島夷
蕭道成廢其主劉準而僭立自號曰齊

四年春正月癸卯乾象六合殿成洮陽羌叛枹罕鎮將
討平之隴西公元琛等攻尅蕭道成馬頭戊乙卯廣川
王略薨雍州氏齊男王反殺美陽令州郡捕斬之丁巳
罷畜鷹鷄之所以其地爲報德佛寺戊午襄城王韓頽

有罪削爵徙邊蕭道成徐州刺史崔文仲寇淮北陷荏
眉戌二月遣尚書游明根率騎二千南討癸巳詔曰朕
承乾緒君臨海內夙興昧旦如履薄冰今東作方興庶
類萌動品物資生膏雨不降歲一不登百姓飢乏朕甚
懼焉其敕天下祀山川羣神及能興雲雨者修飾祠堂
薦以牲璧民有疾苦所在存問三月丙午詔車騎大將
軍馮熙督衆迎還假梁郡王嘉等諸軍乙卯蠕蠕國遣
使朝貢四月乙卯幸廷尉籍坊二獄引見諸囚詔曰廷
尉者天下之平民命之所懸也朕得惟刑之恤者仗獄
官之稱其任也一夫不耕將或受其餒一婦不織將或

受其寒今農時要月百姓肆力之秋而愚民陷罪者甚
衆宜隨輕重決遣以赴耕耘之業辛巳幸白登山甲申
賜天下貧人一戶之內無雜財穀帛者廩一年五月丙
申朔幸火山壬寅還宮六月丁卯以澍雨大洽曲赦京
師以紬綾絹布百萬匹及南伐所俘賜王公已下秋七
月辛亥行幸火山壬子改作東明觀詔會京師耆老賜
錦綵衣服几杖稻米蜜麵復家人不徭役悉萬斤國遣
使朝貢閏月丁亥幸虎圈親錄囚徒輕者皆免之壬辰
頓丘王李鍾葵有罪賜死蕭道成角城戍主請舉城內
屬八月丁酉詔徐州刺史假梁郡王嘉赴接之又遣平

南將軍郎大檀三將出胸城將軍白吐頭二將出海西
將軍元泰二將出連口將軍封匹三將出角城鎮南將
軍賀羅出下蔡甲辰幸方山戊申幸武州山石窟寺庚
戌還宮乙卯詔諸州置冰室蕭道成梁州刺史崔慧景
遣長史裴叔保率衆寇武興關城氏帥楊鼠擊破之叔
保還南鄭九月蕭道成汝南太守常元真龍驤將軍胡
青苟率戶內屬乙亥思義殿成壬午東明觀成戊子詔
曰隆寒雪降諸在微纒及轉輸在都或有凍餒朕用慙
焉可遣侍臣詣廷尉獄及有囚之所周巡省察飢寒者
給以衣食桎梏者代以輕鎖假梁郡王嘉破蕭道成將

盧紹之玄元度於胸山其下蔡戌主熹城遁走冬十月
丁未詔昌黎王馮熙爲西道都督與征南將軍桓誕出
襄陽鎮南將軍賀羅自下蔡東出鍾離蘭陵民桓富殺
其縣令與昌慮桓和北連太山羣盜張和顏等聚黨保
五固推司馬朗之爲主詔淮陽王尉元等討之是歲詔
以州鎮十八水旱民饑開倉賑恤

五年春正月己卯車駕南巡丁亥至中山親見高年問
民疾苦二月辛卯朔大赦天下賜孝悌力田孤貧不能
自存者穀帛有差免宮人年老者還其所親丁酉車駕
幸信都存問如中山癸卯還中山己酉講武于唐水之

陽庚戌車駕還都沙門法秀謀反伏誅南征諸將擊破
蕭道成游擊將軍桓康於淮陽道成豫州刺史垣崇祖
寇下蔡昌黎王馮熙擊破之假梁郡王嘉大破道成將
俘獲三萬餘口送京師三月辛酉朔車駕幸肆州癸亥
講武于雲水之陽所經考察守宰加以黜陟己巳車駕
還宮詔曰法秀妖詐亂常妄說符瑞蘭臺御史張求等
一百餘人招結奴隸謀爲大逆有司科以族誅誠合刑
憲且矜愚重命猶所弗忍其五族者降止同祖三族止
一門門誅止身夏四月己亥行幸方山建永固石室於
山上立碑於石室之庭又銘太皇太后終制于金冊又

起鑿玄殿壬子以南俘萬餘口班賜羣臣甲寅詔曰時
雨不霑春苗萎悴諸有骸骨之處皆敕埋藏勿令露見
有神祇之所悉可禱祈任城王雲薨五月庚申朔詔曰
迺者邊兵屢動勞役未息百姓因之輕陷刑網獄訟煩
興四民失業朕每念之用傷懷抱農時要月民須肆力
其赦天下勿使有留獄久囚壬戌鄧至國遣使朝貢庚
午青州主簿崔次恩聚衆謀叛州軍擊之次恩走郁洲
六月甲辰中山王叡薨戊午封皇叔簡爲齊郡王猛爲
安豐王秋七月甲子蕭道成遣使朝貢辛酉蠕蠕別帥
他稽率衆內附甲戌班乞養雜戶及戶籍之制五條九

月庚午閱武於南郊大饗羣臣蕭道成使車僧朗以班
在劉準使殷靈誕之後辭不就席劉準降人解奉君刃
僧朗於會中詔誅奉君等乙亥封昌黎王馮熙世子誕
爲南平王兖州斬司馬朗之傳首京師冬十月癸卯蠕
蠕國遣使朝貢十有二月癸巳詔以州鎮十二民饑開
倉賑恤

六年春正月甲戌大赦天下二月辛卯詔曰靈丘郡土
旣褊堵又諸州路衝官私所經供費非一往年巡行見
其勞瘁可復民租調十五年癸巳白蘭王吐谷渾翼世
以誣罔伏誅乙未詔曰蕭道成逆亂江淮戎旗頻舉七

州之民旣有征運之勞深乖輕徭之義朕甚愍之其復
常調三年戊申地豆于國遣使朝貢癸丑賜王公已下
清勤著稱者穀帛有差三月庚辰行幸虎圈詔曰虎狼
猛暴食肉殘生取捕之日每多傷害旣無所益損費良
多從今勿復捕貢辛巳幸武州山石窟寺賜貧老者衣
服壬午幸方山是月蕭道成死子曠僭立夏四月甲辰
賜畿內鰥寡孤獨不能自存者粟帛有差六月蠕蠕國
遣使朝貢秋七月發州郡五萬人治靈丘道八月癸未
朔分遣大使巡行天下遭水之處丐民租賦貧儉不自
存者賜以粟帛庚子罷山澤之禁九月辛酉以氏楊後

起爲武都王冬十有一月乙卯吐谷渾國遣使朝貢十
有二月丁亥詔曰朕以寡薄政缺平和不能仰緝緯象
蠲茲六沴去秋淫雨洪水爲災百姓嗷然朕用嗟愍故
遣使者循方賑恤而牧守不思利民之道期於取辦愛
毛反裘甚無謂也今課督未入及將來租筭一以丐之
有司勉加勸課以要來穰稱朕意焉

七年春正月庚申詔曰朕每思知百姓之所疾苦以增
修寬政而明不燭遠寔有缺焉故具問守宰苛虐之狀
於州郡使者秀孝計掾而對多不實甚乖朕虛求之意
宜案以大辟明罔上必誅然情猶未忍可恕罪聽歸申

下天下使知後犯無恕丁卯詔青齊光東徐四州之民
戶運倉粟二十萬石送瑕丘琅邪復租筭一年三月甲
戌以冀定二州民飢詔郡縣爲粥於路以食之又弛關
津之禁任其去來夏四月庚子幸崑崙山賜所過鰥寡不
能自存者衣服粟帛壬寅車駕還宮閏月癸丑皇子生
大赦天下五月戊寅朔幸武州山石窟佛寺六月定州
上言爲粥給饑人所活九十四萬七千餘口秋七月丁
丑帝太皇太后幸神淵池甲申幸方山詔假員外散騎
常侍李彪員外郎蘭英使於蕭墮濟南王羅拔改封趙
郡王九月壬寅詔曰朕承祖宗夙夜惟懼然聽政之際

猶慮未周至於案文審獄思聞已過自今羣官奏事當
獻可替否無或面從俾朕之過彰於遠近冀州上言爲
粥給飢民所活七十五萬一千七百餘口冬十月戊午
皇信堂成十有一月辛丑蕭蹟遣使朝貢十有二月癸
丑詔曰淳風行於上古禮化用乎近葉是以夏殷不嫌
一族之婚周世始絕同姓之娶斯皆教隨時設治因事
改者也皇運初基中原未混撥亂經綸日不暇給古風
遺樸未遑釐改後遂因循迄茲莫變朕屬百年之期當
後仁之政思易質舊式昭惟新自今悉禁絕之有犯以
不道論庚午開林慮山禁與民共之詔以州鎮十三民

飢開倉賑恤

八年春正月詔隴西公元琛尚書陸叡爲東西二道大
使褒善罰惡二月蠕蠕國遣使朝獻夏四月甲寅幸方
山戊午車駕還宮庚申行幸旋鴻池遂幸崞山丁卯還
宮五月己卯詔賑賜河南七州戊戌兵甲申詔員外散騎
常侍李彪員外郎蘭英使於蕭蹟六月丁卯詔曰置官
班祿行之尚矣周禮有食祿之典二漢著受俸之秩逮
于魏晉莫不聿稽往憲以經綸治道自中原喪亂茲制
中絕先朝因循未遑釐改朕永鑒四方求民之瘼夙興
昧旦至於憂勤故憲章舊典始班俸祿罷諸商人以簡

民事戶增調三匹穀二斛九斗以爲官司之祿均預調爲二匹之賦卽兼商用雖有一時之煩終克永逸之益祿行之後賦滿一匹者死變法改度宜爲更始其大赦天下與之惟新戊辰武州水泛濫壞民居舍秋七月乙未行幸方山石窟寺八月甲辰詔曰帝業至重非廣詢無以致治王務至繁非博採無以興功先王知其如此故虛已以求過明恕以思咎是以諫鼓置於堯世謗木立於舜庭用能耳目四達庶類咸熙朕承累聖之洪基屬千載之昌運每布遐風景行前式承明之初班下內外聽人各盡規以補其闕中旨雖宣允稱者少故變時

法遠遵古典班制俸祿改更刑書寬猛未允人或異議思言者莫由申情求諫者無因自達故令上明不周下情壅塞今制百辟卿士工商吏民各上便宜利民益治損化傷政直言極諫勿有所隱務令辭無煩華理從簡實朕將親覽以知世事之要使言之者無罪聞之者足以爲戒九月甲午蕭蹟遣使朝貢戊戌詔曰俸制已立宜時班行其以十月爲首每季一請於是內外百官受祿有差冬十月高麗國遣使朝貢蕭蹟雙城戍主王繼宗內屬十有一月乙未詔員外散騎常侍李彪員外郎蘭英使於蕭蹟十有二月詔以州鎮十五水旱民饑遣

使者循行問所疾苦開倉賑恤

九年春正月戊寅詔曰圖讖之興起於三季既非經國之典徒爲妖邪所憑自今圖讖祕緯及名爲孔子閉房記者一皆焚之留者以大辟論又諸巫覡假稱神鬼妄說吉凶及委巷諸卜非墳典所載者嚴加禁斷癸未大饗羣臣于太華殿班賜皇誥二月己亥制皇子封王者皇孫及曾孫紹封者皇女封者歲祿各有差以廣陽王建第二子嘉紹建後爲廣陽王乙巳詔曰昔之哲王莫不博採下情勤求箴諫建設旌鼓詢納芻蕘朕班祿刑慮不周允虛懷讜直思顯洪猷百司卿士及工商吏

民其各上書極諫靡有所隱三月丙申宕昌國遣使朝貢封皇弟禧爲咸陽王幹爲河南王羽爲廣陵王雍爲潁川王勰爲始平王詳爲北海王夏四月癸丑幸方山甲寅還宮五月高麗國及蕭蹟並遣使朝貢六月辛亥幸方山遂幸靈泉池丁巳還宮秋七月丙寅朔新作諸門癸未遣使拜宕昌王梁彌機兄子彌承爲其國王戊子幸魚池登青原岡甲午還宮八月己亥行幸彌澤甲寅登牛頭山庚申詔曰數州災水飢饉荐臻致有賣鬻男女者天之所譴在予一人而百姓無辜橫罹艱毒朕用殷憂夕惕忘食與寢今自太和六年已來買定冀幽

相四州飢民良口者盡還所親雖娉爲妻妾遇之非理
情不樂者亦離之甲子還宮冬十月丁未詔曰朕承乾
在位十有五年每覽先王之典經綸百氏儲畜旣積黎
元永安爰暨季葉斯道陵替富強者并兼山澤貧弱者
望絕一廛致令地有遺利民無餘財或爭畝畔以亡身
或因飢饉以棄業而欲天下太平百姓豐足安可得哉
今遣使者循行州郡與牧守均給天下之田還受以生
死爲斷勸課農桑興富民之本戊申高麗吐谷渾國並
遣使朝貢辛酉侍中司徒魏郡王陳建薨詔員外散騎
常侍李彪尚書郎公孫阿六頭使蕭曠十有二月乙卯
侍中淮南王他爲司徒蠕蠕犯塞詔任城王澄率衆討
之是年京師及州鎮十三水旱傷稼宕昌高麗吐谷渾
等國並遣使朝貢

魏書卷七下

高祖紀第七下

皇明朝列大夫國子監祭酒臣李廷機

承直郎國子監司業臣方從哲等奉

勅重校刊

十年春正月癸亥朔帝始服袞冕朝饗萬國壬午蠕蠕
犯塞二月甲戌初立黨里隣三長定民戶籍三月丙申
蠕蠕國遣使朝貢庚申蕭蹟遣使朝貢夏四月辛酉朔
始制五等公服甲子帝初以法服御輦祀於西郊癸酉
幸靈泉池戊寅車駕還宮是月高麗吐谷渾國並遣使
朝貢六月辛酉幸方山己卯名皇子曰恂大赦天下秋

七月戊戌幸方山八月乙亥給尚書五等品爵已上朱
衣王珮大小組綬九月辛卯詔起明堂辟雍冬十月癸
酉有司議依故事配始祖於南郊十有一月議定州郡
縣官依戶給俸十有二月壬申蠕蠕犯塞癸未勿吉國
遣使朝貢乙酉詔以汝南潁川大飢丐民田租開倉賑
恤

十有一年春正月丁亥朔詔定樂章非雅者除之二月
甲子詔以肆州之鴈門及代郡民飢開倉賑恤夏四月
己未吐谷渾國遣使朝貢五月壬辰幸靈泉池遂幸方
山癸巳南平王渾薨甲午車駕還宮詔復七廟子孫及

外戚總服已上賦役無所與詔南部尚書公孫文之
谷張伏于率衆南討舞陰山國高麗吐谷渾國遣使朝
貢六月辛巳秦州民飢開倉賑恤癸未詔曰春旱至今
野無青草上天致譴寔由匪德百姓無辜將罹飢饉寤
寐思求罔知所益公卿內外股肱之臣謀猷所寄其極
言無隱以救民瘼秋七月己丑詔曰今年穀不登聽民
出關就食遣使者造籍分遣去留所在開倉賑恤八月
壬申蠕蠕犯塞遣平原王陸叡討之事具蠕蠕傳庚辰
大議北伐進策者百有餘人辛巳罷山北苑以其地賜
貧民悉萬斤國遣使朝獻九月庚戌詔曰去夏以歲旱

民飢須遣就食舊籍雜亂難可分簡故依局割民閱戶造籍欲令去留得實賑貸平均然迺者以來猶有餓死衢路無人收識良由本部不明籍貫未實廩恤不周以至於此朕猥居民上聞用慨然可重遣精檢勿令遺漏冬十月辛未詔罷起部無益之作出宮人不執機杼者甲戌詔曰鄉飲禮廢則長幼之敘亂孟冬十月民閑歲隙宜於此時導以德義可下諸州黨里之內推賢而長者教其里人父慈子孝兄友弟順夫和妻柔不率長教者具以名聞十有一月丁未詔罷尚方錦繡綾羅之工四民欲造任之無禁其御府衣服金銀珠玉綾羅錦繡

太官雜器太僕乘具內庫弓矢出其大半班賚百官及京師士庶下至工商皂隸逮於六鎮戍士各有差戊申詔曰朕惟上政不明令民陷身罪戾今寒氣勁切杖捶難任自今月至來年孟夏不聽拷問罪人又歲既不登民多飢窘輕繫之囚宜速決了無令薄罪又留獄行十有二月詔祕書丞李彪著作郎崔光改析國記依紀傳之體是歲大飢詔所在開倉賑恤

十有二年春正月辛巳朔初建五牛旌旗乙未詔曰鎮戍流徙之人年滿七十孤單窮獨雖有妻妾而無子孫諸如此等聽解名還本諸犯死刑者父母祖父母年老

更無成人子孫旁無暮親者具狀以聞二月壬戌高麗
國遣使朝貢三月丁亥宕昌國遣使朝獻中散梁衆保
等謀反伏誅夏四月高麗吐谷渾國並遣使朝貢蕭贖
將陳顯達等寇邊甲寅詔豫州刺史元斤率衆禦之甲
子大赦天下乙丑幸靈泉池丁卯遂幸方山己巳還宮
陳顯達攻陷醴陽左僕射長樂王穆亮率騎一萬討之
五月丁酉詔六鎮雲中河西及關內六郡各修水田通
渠漑灌壬寅增置彝器於太廟六月甲寅宕昌國遣使
朝貢秋七月己丑幸靈泉池遂幸方山己亥還宮八月
甲子勿吉國貢楛矢石柝九月吐谷渾宕昌國遣使朝

貢甲午詔曰日月薄蝕陰陽之恒度耳聖人懼人君之
放怠因之以設誠故稱日蝕修德月蝕修刑迺癸巳夜
月蝕盡公卿已下宜慎刑罰以答天意丁酉起宣文堂
經武殿癸卯侍中司徒淮南王他薨吐谷渾宕昌武興
諸國各遣使朝貢閏月甲子帝親築園丘於南郊乙丑
高麗國遣使朝貢辛未幸靈泉池癸酉還宮十有一月
詔以二雍豫三州民飢開倉賑恤梁州刺史臨淮王提
坐貪縱徙配北鎮十有二月蠕蠕伊吾成主高羔子率
衆三千以城內附以侍中安豐王猛爲開府儀同三司
十有三年春正月辛亥車駕有事於圓丘於是初備大

駕乙丑兗州民王伯恭聚衆勞山自稱齊王東萊鎮將
孔伯孫討斬之戊辰蕭蹟遣衆寇邊淮陽太守王僧儒
擊走之二月壬午高麗國遣使朝獻庚子引羣臣訪致
道得失損益之宜三月甲子吐谷渾國遣使朝獻夏州
刺史章武王彬以貪昧削封夏四月丁丑詔曰昇樓散
物以資百姓至使人馬騰踐多有毀傷今可斷之以本
所賞之物賜窮老貧獨者丁亥幸靈泉池遂幸方山已
丑還宮吐谷渾國遣使朝貢州鎮十五大飢詔所在
倉賑恤五月庚戌車駕有事於方澤六月汝陰王天賜
南安王椿並坐贓黜免爲庶人高麗國遣使朝貢秋七

月甲辰陰平國遣使朝貢丙寅幸靈泉池與羣臣御
舟賦詩而罷立孔子廟於京師八月乙亥詔兼員外散
騎常侍邢產兼員外散騎侍郎侯靈紹使於蕭蹟戊子
詔諸州鎮有水田之處各通溉灌遣匠者所在指授中
尺國遣使朝貢九月丁未吐谷渾武興宕昌諸國各遣
使朝獻出宮人以賜北鎮人貧鰥無妻者冬十月甲申
高麗國遣使朝貢十有一月己未安豐王猛薨十有二
月丙子侍中司空河東王苟頽薨甲午蕭蹟遣使朝貢
己亥以尚書令尉元爲司徒左僕射穆亮爲司空是歲
蠕蠕別帥叱呂勤率衆內附

十有四年春正月乙丑行幸方山二月辛未行幸靈泉池壬申還宮戊寅初詔定起居注制己卯詔遣侍臣循行州郡問民疾苦三月壬申吐谷渾宕昌武興陰平諸國並遣使朝貢夏四月地豆于頻犯塞甲戌征西大將軍陽平王熙擊走之甲午詔兼員外散騎常侍邢產兼員外散騎侍郎蘇季連使於蕭贖五月己酉庫莫奚犯塞安州都將樓龍兒擊走之沙門司馬惠御自言聖王謀破平原郡擒獲伏誅秋七月甲辰詔罷都牧雜制丙午行幸方山丙辰遂幸靈泉池高麗國遣使朝貢八月丙寅朔車駕還宮辛卯宕昌國遣使朝貢詔議國之行

次九月癸丑太皇太后馮氏崩壬戌高麗國遣使朝貢詔聽蕃鎮曾經內侍者前後奔赴冬十月戊辰詔曰自丁荼苦奄踰晦朔仰遵遺旨祖奠有期朕將親侍龍輿奉訣陵隧諸常從之具悉可停之其武衛之官防侍如法癸酉葬文明太皇太后於永固陵甲戌車駕謁永固陵羣臣固請公除帝不許己卯車駕謁永固陵庚辰帝居廬引見羣寮於太和殿太尉東陽王丕等據權制固請帝引古禮往復羣臣乃止詔在禮志京兆王太興有罪免官削爵詔曰公卿屢依金冊遺旨中代權式請過葬卽吉朕思遵遠古終三年之制依禮旣虞卒哭此月

二十一日授服以葛易麻既衰服在上公卿不得獨釋於下故於朕之授服變從練禮已下復爲節降斟酌今古以制厥衷且取遺旨速除之一端粗申臣子罔極之巨痛癸未詔曰朕遠遵古式欲終三年之禮百辟羣官據金冊顧命將奪朕心從先朝之制朕仰惟金冊俯自推省取諸二衷不許衆議以衰服過暮終四節之慕又奉聖訓聿脩誥旨不敢闇嘿自居以曠機政庶不愆遺令之意差展哀慕之情曾下州鎮長至三元絕告慶之禮甲申車駕謁永固陵辛卯詔曰羣官以萬機事重請求聽政朕仰祇遺命亦思無怠但哀慕纏綿心神迷

不堪自力以親政事近侍先掌機衡者皆謀猷所寄且可任之如有疑事當時與論決十有一月甲寅詔曰垂及至節感慕崩摧凡在臣列誰不哽切內外職人先朝班次及諸方雜客冬至之日盡聽入臨三品以上衰服者至夕復臨其餘唯旦臨而已其拜哭之節一依別儀丁巳蕭躋遣使朝貢十有二月壬午詔依準丘井之式遣使與州郡宣行條制隱口漏丁卽聽附實若朋附豪勢陵抑孤弱罪有常刑

十五年春正月丁卯帝始聽政於皇信東室初分置左右史官吐谷渾國遣使朝貢二月乙亥枹罕鎮將長孫

百年請討吐谷渾所置洮陽泥和二戍許之己丑蕭贖遣使朝貢三月甲辰車駕謁永固陵己酉悉萬斤等五國遣使朝貢夏四月癸亥帝始進蔬食乙丑謁永固陵自正月不用至于癸酉有司奏祈百神詔曰昔成湯遇旱齊景逢災並不由祈山川而致雨皆至誠發中澍潤千里萬方有罪在予一人今普天喪恃幽顯同哀神若有靈猶應未忍安饗何宜四氣未周便欲祀事唯當考躬責己以待天譴甲戌詔員外散騎常侍李彪尚書郎公孫阿六頭使於蕭贖己卯經始明堂改太廟五月己亥議改律令於東明觀折疑獄乙卯百年攻洮陽泥和

二戍克之俘獲三千餘人詔悉免歸高麗國遣使朝獻丙辰詔造五輅六月丁未濟陰王鬱以貪殘賜死秋七月乙丑謁永固陵規建壽陵戊寅吐谷渾國遣使朝貢己卯詔議祖宗以道武爲太祖乙酉車駕巡省京邑聽訟而還八月壬辰議養老又議肆類上帝禋于六宗之禮帝親臨決詔郡國有時物可以薦宗廟者貢之戊戌移道壇於桑乾之陰改曰崇虛寺己亥詔諸州舉秀才先盡才學乙巳親定禘祫之禮丁巳議律令事仍省雜祀九月辛巳蕭贖遣使朝貢壬午吐谷渾高麗宕昌鄧至諸國並遣使朝獻冬十月庚寅車駕謁永固陵是月

明堂太廟成十有一月丁卯遷七廟神主於新廟乙亥
大定官品戊寅考諸牧守詔假通直散騎常侍李彪假
散騎侍郎蔣少遊使蕭蹟丙戌初罷小歲賀丁亥詔二
千石考在上上者假四品將軍賜乘黃馬一匹上中者
五品將軍上下者賜衣一襲十有二月壬辰遷社於內
城之西癸巳頒賜刺史已下衣冠以安定王休爲太傅
齊郡王簡爲太保帝爲高麗王璉舉哀於城東行宮已
酉車駕迎春於東郊辛亥詔簡選樂官

十有六年春正月戊午朔饗羣臣於太華殿帝始爲王
公興懸而不樂已未宗祀顯祖獻文皇帝於明堂以配

上帝遂升靈臺以觀雲物降居青陽左个布政事每朔
依以爲常辛酉始以太祖配南郊壬戌詔定行次以水
承金甲子詔罷祖祿疑乙丑制諸遠屬非太祖子孫及

異姓爲王皆降爲公公爲侯侯爲伯子男仍舊皆除將
軍之號戊辰帝臨思義殿策問秀孝丙子始以孟月祭
廟二月戊子帝移御永樂宮庚寅壞太華殿經始太極
殿辛卯罷寒食饗壬辰幸北部曹歷觀諸省巡省京邑
聽理冤訟甲午初朝日于東郊遂以爲常丁酉詔祀唐
堯於平陽虞舜於廣寧夏禹於安邑周文於洛陽丁未
改諡宣尼曰文聖尼父告諡孔廟三月丁卯巡省京邑

癸酉省西郊郊天雜事乙亥車駕初迎氣南郊自此爲常辛巳以高麗王璉孫雲爲其國王蕭蹟遣使朝貢是月高麗鄧至國並遣使朝貢四月丁亥朔班新律令大赦天下癸巳契齧國遣使朝貢甲寅辛皇宗學親問博士經義五月癸未詔羣臣於皇信堂更定律條流徒限制帝親臨決之六月己丑高麗國遣使朝貢甲辰詔曰務農重穀王政所先勸率田疇君人常事今四氣休序時澤滂潤宜用天分地悉力東畝然京師之民遊食者衆不加督勸或芸耨失時可遣明使檢察勤惰以聞秋七月庚申吐谷渾世子賀虜頭來朝壬戌詔曰王者設

官分職垂拱責成振綱舉綱衆目斯理朕德謝知人豈能一見鑒識徒乖爲君委授之義自今選舉每以季月本曹與吏部銓簡甲戌詔兼員外散騎常侍宋弁兼員外散騎侍郎房亮使於蕭蹟八月庚寅車駕初夕月於西郊遂以爲常辛卯高麗國遣使朝貢乙未詔陽平王頤左僕射陸獻督十二將七萬騎北討蠕蠕丙午宕昌王梁彌承來朝司徒尉元以老遜位巴西以尉元爲三老游明根爲五更又養國老庶老將行大射之禮雨不克成癸丑詔曰文武之道自古並行威福之施必也相藉故三五至仁尚有征伐之事夏殷明獻未捨兵甲之

行然則天下雖平忘戰者殆不教民戰可謂棄之是以
周立司馬之官漢置將軍之職皆所以輔文強武威肅
四方者矣國家雖崇文以懷九服修武以寧八荒然於
習武之方猶爲未盡今則訓文有典教武闕然將於焉
躬之前先行講武之式可勅有司豫修塲埒其列陣之
儀五戎之數別俟後勅九月甲寅朔大序昭穆於明堂
祀文明太皇太后於玄室辛未帝以文明太皇太后再
周忌日哭於陵左絕膳三日哭不輟聲辛巳武興王楊
集始來朝冬十月乙酉鄧至國遣使朝獻巳亥以太傅
安定王休爲大司馬特進馮誕爲司徒甲辰詔以功臣

配饗太廟丙午高麗國遣使朝獻庚戌太極殿成大饗
羣臣十有一月乙卯依古六寢權制三室以安昌殿爲
內寢皇信堂爲中寢四下疑爲外寢十有二月賜京邑
老人鳩杖是月蕭蹟遣使朝貢

十有七年春正月壬子朔帝饗百寮於太極殿乙丑詔
曰夫駿奔入覲臣下之常式錫馬賜車君人之恒惠今
諸邊君蕃胤皆虔集象魏趨鏘紫庭貢饗旣畢言旋無
遠各可依秩賜車旗衣馬務令優厚其武興宕昌各賜
錦繒纊一千吐谷渾世子八百鄧至世子雖因緣至都
亦宜賚及可賜三百命數之差皆依別牒詔兼員外散

騎侍郎劉承叔使於蕭蹟乙亥勿吉國遣使朝獻丙子
以吐谷渾伏連籌爲其國王庚辰緡大司馬安定王休
太保齊郡王簡朔望之朝二月乙酉詔賜議律令之官
各有差已酉車駕始籍田於都南三月戊辰改作後宮
帝幸永興園徙御宣文堂吐谷渾國遣使朝獻夏四月
戊戌立皇后馮氏是月蕭蹟征虜將軍直閣將軍蠻酋
田益宗率部落四千餘戶內屬五月乙卯宕昌陰平契
丹庫莫奚諸國並遣使朝獻壬戌宴四廟子孫於宣文
堂帝親與之齒行家人之禮甲子帝臨朝堂引見公卿
已下決疑政錄囚徒丁丑以旱撤膳襄陽蠻酋雷婆恩

等率一千三百餘戶內徙居於太和川六月丙戌帝將
南伐詔造河橋已丑詔免徐南豫陝岐東徐洛豫七州
軍糧乙未講武乙巳詔曰六職備于周經九列炳於漢
晉務必有人守其職比百秩雖陳事典未叙自八元
樹位躬加省覽遠依往籍近採時宜作職員令二十一
卷事迫戎期未善周悉雖不足綱範萬度永垂不朽且
可釋滯目前釐整時務須待軍回更論所闕權可付外
施行其有當局所疑而令文不載者隨事以聞當更附
之立皇子恂爲皇太子戊申高麗國遣使朝獻秋七月
癸丑以皇太子立詔賜民爲人後者爵一級爲公士曾

魏書卷七十一 帝紀 十三
為吏屬者爵二級為上造鰥寡孤獨不能自存者人粟
五斛戊午中外戒嚴是月蕭贖死孫昭業僭立八月乙
酉三老山陽郡公尉元薨丙戌車駕類於上帝遂臨尉
元喪丁亥帝辭永固陵己丑車駕發京師南伐步騎百
餘萬太尉不奏請以宮人從詔曰臨戎不語內事宜停
來請壬寅車駕至肆州民年七十已上賜爵一級路見
眇跛者停駕親問賜衣食終身戊申幸并州親見高年
問所疾苦九月壬子詔兼員外散騎常侍高聰兼員外
散騎侍郎賈禎使於蕭昭業丁巳詔以車駕所經傷民
秋稼者畝給穀五斛戊辰濟河詔洛懷并肆所過四州

之民百年以上假縣令九十以上賜爵三級八十以上
賜爵二級七十以上賜爵一級鰥寡孤獨不能自存者
粟人五斛帛二匹孝悌廉義文武應求者皆以名聞又
詔廝養之戶不得與士民婚有文武之才積勞應進者
同庶族例聽之庚午幸洛陽周巡故宮基址帝顧謂侍
臣曰晉德不修早傾宗祀荒毀至此用傷朕懷遂詠黍
離之詩為之流涕壬申觀洛橋幸太學觀石經乙亥鄧
至王像舒彭遣子舊詣闕朝貢并奉表求以位授舊詔
許之丙子詔六軍發軫丁丑戎服執鞭御馬而出羣臣
稽顙於馬前請停南伐帝乃止仍定遷都之計冬十月

戊寅朔幸金墉城詔徵司空穆亮與尚書李沖將作大匠董爵經始洛京巳卯幸河南城乙酉幸豫州癸巳次於石濟乙未解嚴設壇於滑臺城東告行廟以遷都之意大赦天下起滑臺宮又詔京師及諸州從戎者賜爵一級應募者加二級主將加三級癸卯幸鄴城乙巳詔安定王休率從官迎家於代京車駕送於漳水上初帝之南伐也起宮殿於鄴西十有一月癸亥宮成徙御焉十有二月戊寅巡省六軍庚寅陰平國遣使朝貢乙未詔隱恤軍士死亡疾病務令優給

十有八年春正月丁未朔朝羣臣於鄴宮澄鸞殿丁巳

高麗國遣使朝獻癸亥車駕南巡詔相克豫三州百岁以上假縣令九十以上賜爵二級七十以上賜爵一級孤老鰥寡不能自存者賜粟五石帛二疋孝悌廉義文武應求者皆以名聞戊辰經殷比干之墓祭以太牢乙亥幸洛陽西宮二月巳丑行幸河陰規建方澤之所丙申河南王幹徙封趙郡潁川王雍徙封高陽壬寅車駕北巡癸卯濟河蕭昭業遣使朝貢甲辰詔天下喻以遷都之意閏月癸亥次句注陘南皇太子朝于蒲池壬申至平城宮癸酉臨朝堂部分遷留甲戌謁永固陵三月庚辰罷西郊祭壬辰帝臨太極殿諭在代羣臣以遷

移之略夏五月乙亥詔罷五月五日七月七日饗六月
巳巳詔兼員外散騎常侍盧昶兼員外散騎侍郎王清
石使於蕭昭業秋七月乙亥以宋王劉昶爲大將軍壬
午侍中大司馬安定王休薨辛卯高麗國遣使朝貢壬
辰車駕北巡戊戌謁金陵辛丑幸朔州是月島夷蕭鸞
殺其主蕭昭業立昭業弟昭文八月癸卯皇太子朝於
行宮甲辰行幸陰山觀雲川丁未幸閱武臺臨觀講武
癸丑幸懷朔鎮巳未幸武川鎮辛酉幸撫定鎮甲子幸
柔玄鎮乙丑南還所過皆親見高年問民疾苦貧窮孤
老賜以粟帛丙寅詔六鎮及禦夷城人年八十以上而

無子孫兄弟終身給其廩粟七十以上家貧者各賜粟
十斛又詔諸北城人年滿七十以上及廢疾之徒校其
元犯以準新律事當從坐者聽一身還鄉又令一子扶
養終命之後乃遣歸邊自餘之處如此之犯年八十以
上皆聽還戊辰車駕次旋鴻池庚午謁永固陵辛未還
平城宮九月壬申朔詔曰三載考績自古通經三考黜
陟以彰能否今若待三考然後黜陟可黜者不足爲遲
可進者大成賒緩是以朕今三載一考考卽黜陟欲令
愚滯無妨於賢者才能不壅於下位各令當曹考其優
劣爲三等六品以下尚書重問五品以上朕將親與公

卿論其善惡上上者遷之下下者黜之中中者守其本
任壬午帝臨朝堂親加黜陟壬辰陰平王楊炅來朝冬
十月甲辰以太尉東陽王丕爲太傅戊申親告太廟奉
遷神主辛亥車駕發平城宮壬戌次於中山之唐湖乙
丑分遣侍臣巡問民所疾苦己巳幸信都庚午詔曰此
聞緣邊之蠻多有竊掠致有父子乖離室家分絕旣虧
和氣有傷仁厚方一區宇子育萬姓若苟如此南人豈
知朝德哉可詔荆郢東荆三州勅勅蠻民勿有侵暴是
月蕭鸞廢殺其主蕭昭文而僭立十有一月辛未朔詔
冀定二州民百年以上假以縣令九十以上賜爵三級

六十以上賜爵二級七十以上賜爵一級鰥寡孤獨不
能自存者賜以穀帛孝義廉貞文武應求者具以名聞
丁丑車駕幸鄴甲申經比干之墓傷其忠而獲戾親爲
弔文樹碑而刊之己丑車駕至洛陽蕭鸞雍州刺史曹
虎據襄陽請降十有二月辛丑朔遣行征南將軍薛真
度督四將出襄陽大將軍劉昶出義陽徐州刺史元衍
出鍾離平南將軍劉藻出南鄭壬寅革衣服之制癸卯
詔中外戒嚴戊申優復代遷之戶租賦三歲己酉詔王
公侯伯子男開國食邑者王食半公三分食一侯伯四
分食一子男五分食一辛亥車駕南伐丁卯詔郢豫二

州之民百齡以上假縣令九十以上賜爵三級八十以上賜爵二級七十以上賜爵一級孤寡鰥老不能自存者賜以穀帛緣路之民復田租一歲孝悌廉義文武應求具以名聞戊辰車駕至懸瓠巳巳詔壽陽鍾離馬頭之師所獲男女之口皆放還南

十有九年春正月辛未朔朝饗羣臣於懸瓠癸酉詔禁淮北之民不得侵掠犯者以大辟論甲戌檄喻蕭鸞丙子鸞龍陽縣開國侯王朗自渦陽來降壬午講武於汝水之西大賚六軍丙申平南將軍王肅頻破蕭鸞將擒其寧州刺史董巒巳亥車駕濟淮二月甲辰幸八公山

路中雨甚詔去蓋見軍士病者親隱恤之戊申車駕巡淮而東民皆安堵租運屬路壬子高麗國遣使朝獻丙辰車駕至鍾離戊午軍士擒蕭鸞三千卒帝曰在君為君其民何罪於是免歸辛酉車駕發鍾離將臨江水司徒馮誕薨壬戌乃詔班師丁卯遣使臨江數蕭鸞殺主自立之罪惡三月戊寅幸邵陽戊子太師馮熙薨乙未幸下邳鄧至國遣使朝貢夏四月庚子車駕幸彭城辛丑帝為太師馮熙舉哀於行在所丁未曲赦徐豫二州其還漕之士復租賦三年辛亥詔賜百歲以上假縣令九十以上賜爵三級八十以上賜爵二級七十以上賜

爵一級孤寡老疾不能自存者賜以穀帛德著丘園者具以名聞蕭鸞民降者給復十五年癸丑幸小沛遣使以太牢祭漢高祖廟己未行幸瑕丘遣使以太牢祠岱岳詔宿衛武官增位一級庚申行幸魯城親祠孔子廟辛酉詔拜孔氏四人顏氏二人爲官詔兗州刺史舉部內士人才堪軍國及守宰治行具以名聞又詔賜兗州民爵及粟帛如徐州又詔選諸孔宗子一人封崇聖侯邑一百戶以奉孔子之祀又詔兗州爲孔子起園栢修飾墳壠更建碑銘褒揚聖德戊辰行幸碭碭太和廟成五月己巳城陽王鸞赭陽失利降爲定襄縣王廣川王

諧薨庚午遷文成皇后馮氏神主于太和廟甲戌行幸滑臺丙子次于石濟庚辰皇太子朝於平桃城高麗吐谷渾國並遣使朝貢癸未車駕至自南伐告于太廟甲申減閑官祿以禪軍國之用乙酉行飲至之禮班賜有差甲午皇太子冠於廟六月己亥詔不得以北俗之語言於朝廷若有違者免所居官辛丑詔復軍士從駕渡淮者租賦三年癸卯詔皇太子赴平城宮壬子詔濟州東郡滎陽及河南諸縣車駕所經者百年以上賜假縣令九十以上賜爵三級八十以上賜爵二級七十以上賜爵一級孤老鰥寡不能自存賜以穀帛孝悌廉義文

武應求者具以名聞癸丑詔求天下遺書祕閣所無有
禪益時用者加以優賞乙卯曲赦梁州復民田租三歲
丙辰詔遷洛之民死葬河南不得還北於是代人南遷
者悉爲河南洛陽人戊午詔改長尺大斗依周禮制度
班之天下八月甲辰幸西宮路見壞冢露棺駐輦蹙之
乙巳詔選天下武勇之士十五萬人爲羽林虎賁以充
宿衛丁巳詔諸從兵從征被傷者皆聽還本金墉宮成
甲子引羣臣歷宴殿堂九月庚午六宮及文武盡遷洛
陽丙戌行幸鄴丁亥詔曰諸有舊墓銘記見存昭然爲
時人所知者三公及位從公者去墓三十步尚書令僕

九列十五步黃門五校十步各不聽懇殖壬辰遣黃門
郎以太牢祭比干之墓乙未車駕還宮冬十月甲辰曲
赦相州民百年以上假郡守九十以上假縣令八十以
上賜爵三級七十以上賜爵二級孤老痼疾不能自存
者賜以穀帛丙辰車駕至自鄴辛酉詔州郡諸有士庶
經行脩敏文思適逸才長吏治堪幹政事者以時發遣
壬戌詔諸州牧精品屬官考其得失爲三等之科以聞
將親覽而升降焉詔徐兗光南青荆洛六州纂嚴戎備
應須赴集十有一月行幸委粟山議定圓丘甲申有事
於圓丘丙戌大赦天下十有二月乙未朔引見羣臣於

光極堂宣示品令爲大選之始辛酉驃騎大將軍司州牧咸陽王禧爲長兼太尉前南安王楨復本封以特進廣陵王羽爲征東大將軍開府儀同三司青州刺史甲子引見羣臣於光極堂班賜冠服

二十年春正月丁卯詔改姓爲元氏壬辰改封始平王勰爲彭城王以定襄縣王鸞復封城陽王二月辛丑帝幸華林聽訟於都亭壬寅詔自非金革聽終三年喪丙午詔畿內七十以上暮春赴京師將行養老之禮庚戌幸華林聽訟於都亭癸丑詔介山之邑聽爲寒食自餘禁斷三月丙寅宴羣臣及國老庶老於華林園詔國老

黃耆以上假中散大夫郡守耆年以上假給事中縣令庶老直假郡縣各賜鳩杖衣裳丁丑詔諸州中正各舉其鄉之民望年五十以上守素衡門者授以令長夏四月甲辰廣州刺史薛法護南叛五月丙子詔曰農惟政首稷實民先澍雨豐洽所宜敦勵其令畿內嚴加課督墮業者申以楚撻力田者具以名聞丙戌初營方澤於河陰遣使者以太牢祭漢光武及明章三帝陵又詔漢魏晉諸帝陵各禁方百步不得樵蘇踐蹋丁亥車駕有事於方澤七月廢皇后馮氏戊寅帝以久旱咸秩羣神自癸未不食至于乙酉是夜澍雨大洽丁亥詔曰炎陽

爽節秋零卷澍在予之責實深悚慄故輟膳三晨以命
上訴靈鑒誠款曲流雲液雖休勿休寧敢愆怠將有賢
人湛德高士凝棲雖加銓採未能招致其精訪幽谷舉
茲賢彥直言極諫匡予不及又邪佞毀朝固唯治蠹食
夫竊位大政以虧主者彈劾不肖明黜盜祿又法爲治
要民命尤重在京之囚悉命條奏朕將親案以時議決
又疾苦六極人神所矜宜時訪恤以拯窮廢鰥寡困乏
不能自存者明加矜恤令得存濟又輕徭薄賦君人常
理歲中恒役具以狀聞又夫婦之道生民所先仲春奔
會禮有達式男女失時者以禮會之又京民始業農桑

爲本田稼多少課督不具以狀言八月壬辰朔幸華林
園親錄囚徒咸降本罪二等決遣之戊戌車駕幸嵩高
甲寅還宮丁巳南安王楨薨幸華林園聽訟九月戊辰
車駕閱武於小平津癸酉還宮丁亥將通洛水入穀帝
親臨觀冬十月戊戌以代遷之士皆爲羽林虎賁司州
之民十二夫調一吏爲四年更卒歲開畚假以供公私
力役己酉曲赦京師十有一月乙酉復封前汝陰王天
賜孫景和爲汝陰王前京兆王太興爲西河王閏月丙
辰右將軍元隆大破汾州叛胡十有二月甲子以西北
州郡旱儉遣侍臣循察開倉賑恤乙丑開鹽池之禁與

民共之丙寅廢皇太子恂爲庶人丁卯告太廟戊辰置
常平倉恒州刺史穆泰等在州謀反遣行吏部尚書任
城王澄案治之樂陵王思譽坐知泰陰謀不告削爵爲
庶人

二十有一年春正月丙申立皇子恪爲皇太子賜天下
爲父後者爵一級己亥遣兼侍中張彝崔光兼散騎常
侍劉藻巡方省察問民疾苦黜陟守宰宣揚風化乙巳
車駕北巡二月壬戌次於太原親見高年問所不便乙
丑詔并州士人年六十已上假以郡守先是定州民王
金鈞訛言惑衆自稱應王丙寅州郡捕斬之癸酉車駕

至平城甲戌謁永固陵癸未行幸雲中三月庚寅車駕
至自雲中辛卯謁金陵乙未車駕南巡己酉次離石叛
胡歸罪宥之甲寅詔汾州民百年以上假縣令九十以
上賜爵三級八十以上賜爵二級七十以上賜爵一級
丙辰車駕次平陽遣使者以太牢祭唐堯夏四月庚申
幸龍門遣使者以太牢祭夏禹癸亥行幸蒲坂遣使者
以太牢祭虞舜戊辰詔脩堯舜夏禹廟辛未行幸長安
壬申武興王楊集始來朝乙亥親見高年問所疾苦丙
子遣侍臣分省縣邑賑賜穀帛戊寅幸未央殿阿房宮
遂幸昆明池癸未大將軍宋王劉昶薨丙戌遣使者以

太牢祀漢帝諸陵五月丁亥朔衛大國遣使朝貢巳丑
車駕東旋汎渭入河庚寅詔雍州士人百年以上假華
郡太守九十以上假荒郡八十以上假華縣令七十以
上假荒縣庶老以年各減一等七十以上賜爵三級其
營船之夫賜爵一級孤寡鰥貧窮痾廢疾各賜帛二匹
穀五斛其孝友德義文學才幹悉仰貢舉壬辰遣使者
以太牢祭周文王於豐祭武王於鎬癸卯遣使祭華嶽
六月庚申車駕至自長安壬戌詔冀定瀛相濟五州發
卒二十萬將以南討癸亥司空穆亮遜位丁卯部分六
師以定行留秋七月甲午立昭儀馮氏爲皇后戊辰以

前司空穆亮爲征北大將軍開府儀同三司冀州刺史
甲寅帝親爲羣臣講喪服於清徽堂八月丙辰詔中外
戒嚴壬戌立皇子愉爲京兆王懌爲清河王懷爲廣平
王壬申行幸河南城甲戌講武於華林園庚辰車駕南
討九月丙申詔曰哀貧恤老王者所先鰥寡六疾尤宜
矜愍可勅司州洛陽之民年七十已上無子孫六十以
上無菴親貧不自存者給以衣食及不滿六十而有廢
痾之疾無大功之親窮困無以自療者皆於別坊遣醫
救護給醫師四人豫請藥物以療之丁酉詔河南尹李
崇討梁州叛羌受征西源懷節度辛丑帝留諸將攻赭

陽引師而南癸卯至宛城夜襲其郛克之丁未車駕發南陽留太尉咸陽王禧前將軍元英攻之巳酉車駕至新野冬十月丁巳四面進攻不克詔左右軍築長圍以守之乙亥追廢貞皇后林氏爲庶人十有一月甲午蕭鸞前軍將軍韓秀方弋陽太守王副之後軍將軍趙祖悅等十五將來降丁酉大破賊軍於沔北獲其將軍王伏保等於是民皆復業九十以上假以郡守六十五以上假以縣令新野民張睹柵萬餘家拒守不下十有二月庚申破之俘斬萬餘丁卯詔流徙之內皆勿決遣有登城之際令其先鋒自效庚午車駕臨沔遂巡沔東還

戊寅車駕還新野巳卯親行營壘隱恤六軍蕭鸞將王曇紛等萬餘人寇南青州黃郭戍戍主崔僧淵擊破之悉虜其衆以齊郡王子琛紹河間王若後高昌國遣使朝貢

二十有二年春正月癸未朔朝饗羣臣於新野行宮丁亥拔新野獲蕭鸞輔國將軍新野太守劉忌斬之於宛戊子鸞湖陽戍主蔡道福棄城遁走辛卯鸞赭陽戍主成公期軍主胡松棄城遁走壬辰鸞輔國將軍舞陰戍主黃瑤起及直閣將軍臺軍主鮑舉南鄉太守席謙相尋遁走瑤起鮑舉爲軍人所獲送庚戌行幸南陽二月

乙卯進攻宛北城甲子拔之鸞冠軍將軍南陽太守房伯玉面縛出降庚午車駕幸新野辛未詔以穰民首歸大順終始若一者給復三十年標其所居曰歸義鄉次降者給復十五年三月壬午朔大破鸞平北將軍崔惠景黃門郎蕭衍軍於鄧城斬獲首虜二萬有餘庚寅行幸樊城觀兵襄沔耀武而還曲赦二荆魯陽郡鎮南將軍王肅攻鸞義陽鸞遣將裴叔業寇渦陽乙未詔將軍鄭思明嚴虛敬宇文福等三軍繼援辛丑行幸湖陽乙未次比陽戊申詔荊州諸郡之民初降次附復同穰縣辛亥行幸懸瓠夏四月甲寅從征武直之官進位三階

文官二級外官一階庚午發州郡兵二十萬人限八月中旬集懸瓠趙郡王幹薨五月丙午詔在征身喪者四品已下及卑兼之職給帛有差六月庚申詔諸王將士戰沒皆加優贈秋七月壬午詔曰朕以寡德屬茲靖亂實賴羣英凱清南夏宜約躬賞效以勸茂績后之私府便可損半六宮嬪御五服男女常恤恒供亦令減半在戎之親三分省一是月蕭鸞死子寶卷僭立八月辛亥皇太子自京師來朝壬子蕭寶卷奉朝請鄧學擁其齊興郡內屬勅勒樹者相率反叛詔平北將軍江陽王繼都督北討諸軍事以討之壬戌高麗國遣使朝獻九月

已亥帝以蕭鸞死禮不伐喪乃詔反旆庚子仍將北伐
叛虜丙午車駕發懸瓠冬十月巳酉朔曲赦二豫殊死
巳下復民田租一歲十有一月辛巳幸鄴十有二月甲
寅以江陽王繼定勅勅乃詔班師

二十有三年春正月戊寅朔朝羣臣以帝疾瘳上壽大
饗於澄鸞殿壬午幸西門豹祠遂歷漳水而還蕭寶卷
遣太尉陳顯達寇荊州癸未詔前將軍元英討之乙酉
車駕發鄴戊戌至自鄴庚子告於廟社癸卯行飲至策
勳之禮甲辰大赦天下太保齊郡王簡薨二月辛亥以
長兼太尉咸陽王禧爲正太尉癸亥以中軍大將軍彭

城王勰爲司徒復樂陵王勰爲本封癸酉詔班師
圍戊三月庚辰車駕南伐癸未次梁城甲申以順陽被
圍危急詔振武將軍慕容平城率騎五千赴之丙戌帝
不豫司徒彭城王勰侍疾禁中且攝百揆丁酉車駕至
馬圈詔鎮南大將軍廣陽王嘉斷均口邀顯達歸路戊
戌頻戰破之其夜顯達及崔惠景曹虎等宵遁巳亥收
其戎資億計班賜六軍諸將追奔及於漢水斬獲及赴
水而死者十八九斬寶卷左軍將軍張于達等賊將蔡
道福成公期率數萬人棄順陽遁走庚子帝疾甚車駕
北次穀塘原甲辰詔賜皇后馮氏死詔司徒勰徵太子

於魯陽踐阼詔以侍中護軍將軍北海王詳爲司空公
鎮南將軍王肅爲尚書令鎮南大將軍廣陽王嘉爲尚
書左僕射尚書宋弁爲吏部尚書與侍中太尉公禧尚
書右僕射任城王澄等六人輔政顧命宰輔曰粵爾太
尉司空尚書令左右僕射吏部尚書惟我太祖丕丕之
業與四象齊茂累聖重明屬鴻曆於寡昧兢兢業業思
纂乃聖之遺蹤遷都嵩極定鼎河瀍庶南蕩甌吳復禮
萬國以仰光七廟俯濟蒼生困窮早滅不永乃志公卿
其善毗繼子隆我魏室不亦善歟可不勉之夏四月丙
午朔帝崩於穀塘原之行宮時年三十三祕諱至魯陽

發哀還京師上謚曰孝文皇帝廟曰高祖五月丙申葬
長陵帝幼有至性年四歲顯祖曾患癰帝親自吮膿五
歲受禪悲泣不能自勝顯祖問帝帝曰代親之感內切
於心顯祖甚歎異之文明太后以帝聰聖後或不利於
馮氏將謀廢帝乃於寒月單衣閉室絕食三朝召咸陽
王禧將立之元丕穆秦李冲固諫乃止帝初不有憾唯
深德丕等撫念諸弟始終曾無纖介悖睦九族禮敬俱
深雖於大臣持法不縱然性寬慈每垂衿捨進食者曾
以熱羹傷帝手又曾於食中得蟲穢之物並笑而恕之
宦者先有譖帝於太后太后大怒杖帝數十帝默然而

受不自申明太后崩後亦不以介意聽覽政事莫不從善如流哀矜百姓恒思所以濟益天地五郊宗廟二分之禮常必躬親不以寒暑爲倦尚書奏案多自尋省百官大小無不留心務於周洽每言凡爲人君患於不均不能推誠御物苟能均誠胡越之人亦可親如兄弟常從容謂史官曰直書時事無諱國惡人君威福自巳史復不書將何所懼南北征巡有司奏請治道帝曰粗脩橋梁通輿馬便止不須去草刻今平也凡所脩造不得已而爲之不爲不急之事損民力也巡幸淮南如在內地軍事須伐民樹者必留絹以酬其直民稻粟無所

踐諸有禁忌禳厭之方非典籍所載者一皆除罷雅好讀書手不釋卷五經之義覽之便講學不師受探其精奧史傳百家無不該涉善談莊老尤精釋義才藻富贍好爲文章詩賦銘頌任興而作有大文筆馬上口授及其成也不改一字自太和十年已後詔冊皆帝之文也自餘文章百有餘篇愛竒好士情如飢渴待納朝賢隨才輕重常寄以布素之意悠然玄邁不以世務嬰心又少而善射有膂力年十餘歲能以指彈碎羊髀骨及射禽獸莫不隨所志斃之至年十五便不復殺生射獵之事悉止性儉素常服澣濯之衣鞞勒鐵木而已帝之雅

志皆此類也

史臣曰有魏始基代朔廓平南夏闢壤經世咸以威武
爲業文教之事所未遑也高祖幼承洪緒早著獻聖之
風時以文明攝事優游恭已玄覽獨得著自不言神契
所標固以符於冥化及躬總大政一日萬機十許年間
曾不暇給殊途同歸百慮一致至夫生民所難行人倫
之高迹雖尊居黃屋盡蹈之矣若乃欽明稽古協御天
人帝王制作朝野軌度斟酌用捨煥乎其有文章海內
生民咸受耳目之賜加以雄才大略愛竒好士視下如
傷役已利物亦無得而稱之其經緯天地豈虛諡也

魏書卷七下終

不遠也高祖幼

